

四庫全書

史部

欽定四庫全書

浙江通志卷二百一

仙釋四

衢州府

晉

吳猛

許旌陽化錄字世雲濮陽人仕吳為西安令因家焉性至孝齟齬時夏月手不驅蚊懼其去已

而噬親也年四十得至人丁義神方繼師南海太守鮑靚復得秘法吳黃龍中天降白雲符授之道術大行嘗見暴風驟發書符擲屋上有青鳥啣去風即止或問其故荅曰南湖有舟遇此風中有二

道士呼天求救故以此止之驗之果然海鹽令干慶歿已三日猛曰令數未盡當為訟之於天遂臥屍傍數日與慶俱起慶弟著作郎寶感其異遂作搜神記行於世永康二年復還西安十月十五日遂乘白鹿車與弟子四人白晝沖昇宅號紫雲府晉書猛還豫章江以白羽扇畫水而渡

王質

洞仙傳東陽人入山伐木見石室中有數童子圍棋質置斧柯觀之童子以一物如棗核與質

令含咽便不覺饑渴童子云汝來已久可還質取斧柯爛已盡便歸家計已數百年爛柯山志質隨雲出山迷失歸路沿溪累日至舊居見鄉閭半為墟隴與弟貴復入此山不知所終或謂其弟兄咸得道云

唐

詹妙容

名勝志番陽女子唐貞元初修真於須江縣之筋竹山楮衣木食騰空而逝

鄧去奢

續仙傳衢州龍邱人家九峯山下少入道年三十餘居處州松陽縣安和觀觀北五里有

卯山高五十餘文相傳漢張天師及葉靜能皆居此山修道去奢慕前事結菴以居朝夕焚修山東南有一方石濶二丈餘平若砥常坐其上拱默靜想一旦感神人謂曰天師有斬邪劍二口并瓶貯丹在此石下可取之去但勤修無怠去奢取劍乃天師七星劍丹如麻子紅色光明去奢自服及施人疾皆愈時麗水人華造因中和間荒亂之後擁土人據巖險聞去奢神與劍丹乃以兵圍其山奪其劍丹而囚去奢於空室中一月不與之水及開室見顏狀紅白愈於來時造驚異送去奢歸山留其劍丹一夜風雷飛鳴劍丹仍歸石下居山十五年常見龍虎異鳥行於庭際又從道士寄宿夜聞

去奢所居室若與人談竊窺之惟聞異香滿室及環珮聲或見有戴遠遊冠絳服螺髻垂髮碧綃衣男女四人對坐侍從皆金童玉女光明照身復有神人遠立於側道士乃虔敬之一日告道士曰恐當離此山不長相見也後數日有綵雲鸞鶴輶輿幡幢迎去奢昇天而去

徐簡

弘治衢州府志景靈宮道士修煉於巖之烏龍山既得道白日仙去

道義

高僧傳衢州人開元中至清涼寺弼院居止典座普請運柴義將竹鞋一緹轉買人荷擔因披

三事衲衣東北而行可五里於楞伽山下逢一老僧引一童子前行乃相隨入寺見大閣二層上下九間總如金色閃爍其目老僧令義早還辭出寺行及百步迴顧惟是山林乃知化寺也義後不知其終

惟寬

景德傳燈錄衢州信安人姓祝氏年十三見教生者盡然不忍食乃求出家初習毘尼修止觀

後叅大寂乃得心要唐貞元六年行化於吳越間元和四年憲宗詔至闕下白居易嘗詣師問曰既曰禪師何說法師曰無上菩提者被於身為律說於口為法行於心為禪應用者三其致一也十二年二月升堂說法訖就化勅謚大徹禪師

藏廩

高僧傳俗姓程衢州信安人造長沙嶽麓投靈智律師剃染尋於武林開元寺受具足因聽律

範旋窮篇聚語同業曰教門繁廣然有總門總門之急勿過捨筏遂徧叅禪宗遇馬素門下高足住龍牙山知廩法器告之曰蘊界不真佛生非我子之正本復從誰得廩一言領會却迴柯山大中六年郡牧崔壽重之於龍興寺別構禪室延居之乾符六年終

利蹤

釋氏稽古畧澶州人姓周氏出家幽州開元寺依年受具入南泉室抵衡州馬蹄山至開成二

年邑人翁遷貴施山下子湖創院以居廣明元年入寂塔於本山指月錄初子湖山下有陶家無子夫婦日夕焚禱師過而問之爾何所祈陶告其故師曰汝施我竹我施汝子陶遂施竹其夕感異夢隨舉一男衆因號神力禪師

慧聞

高僧傳信安人多勸勉檀那以福業為最嘗於潞江鑄丈八金身像有清溪縣夫妻二人將奩

鑑來捨聞為咒之曰此鑑鼓鑄若當佛心前乃是夫妻發心之至迨脫模露像果然鑑當佛心又嘗往豫章勸化獲黃金數鑑俄遇賊劫聞投金水中曰慮損君子福田請自撈撿賊泳水求之不得及聞到州金已在其院中山路虎豹或逢之將杖叩其腦曰汝勿害人吾造功德明日虎銜野豬投聞

前拜尾
而去

五代

儀宴

十國春秋湖州許氏子生於唐乾符三年開運中遊江郎巖觀石龕謂弟子慧興曰予入定此

中汝當壘石塞門慧興如所戒明年啓視素髮披肩胸尚煖徐自定起了無異容已復回信安烏巨山侍郎慎知禮鎮衢州命僧守榮詰其定相儀宴殊不與辨守榮禮像得舍利數枚嘆曰宴公真不可以淺測也忠懿王一夕夢師來見遣使圖像至適王患目疾展像作禮目疾頓瘳因賜號開明禪師宋太宗召對便殿言禪定事深契上旨久之得請還山淳化元年卒壽一百五十歲

遇緣

五燈會元衢州南禪遇緣禪師有俗士號鐵腳者忽騎馬至僧問師既是鐵腳為甚麼騎馬師

曰腰帶不因遮腹痛幙頭豈是禦天寒又問師和尚恁麼後生為甚麼却為尊宿師曰千歲祇言朱頂鶴朝生便是鳳凰兒上堂有僧問衆手淘金誰是得者師曰谿畔披沙徒自困家中有寶速須還曰恁麼即始終不從人得去師曰饒君便有擎山力未免肩頭有擔脫

宋

王自然

名勝志天童八仙山道士棄家修煉於此有行道行能致雷雨元祐間即其所居建玉霄宮

初縣前池多蛙譙樓多蚊縣令請自然驅之遂絕至今猶然

陳應祥

弘治衢州府志字知明政和間試修文輔教科授凝神殿校籍嘗詔為高麗國教師尚書

毛友以詩送之應祥能詩手抄為二十卷於太虛觀側卓菴程公俱名以常清靜且銘之

繆道者

弘治衢州府志西安之原口山多猛獸阻險往來者沿崖攀木側足以行春夏水溢則病

涉道者來居甘泉寺鑿山開道遇虎狼則手撫之使去熙寧間以火自化今號金川聖者

劉鐵磨

名勝志宋比丘尼嘗參于胡禪師師曰汝是劉鐵磨乎曰不敢師曰左轉右轉尼曰和尚

莫顛倒因有悟其後尼乃倒化

道行

五燈會元衢州烏巨禪師處州葉氏子依普照英禪師得度去叅佛眼一日聞舉元沙築著脚

指話遂大悟羅湖野錄程待制智道曾侍郎天游寓三衢與烏巨行禪師為方外友曾嘗於坐間舉東坡宿東林偈溪聲便是廣長舌山色無非清淨身夜來八萬四千偈他日如何舉似人問行曰此老見處如何行曰可惜雙腳踏在爛泥裏曾曰能料理否行曰溪聲廣長舌山色清淨身八萬四千

偈明明舉似人二公相顧嘆服指月錄師示疾教授汪喬年至師以後事委之示以偈曰識則識自本心見則見自本性識得本心本性正是宗門大病注曰爛泥中有刺莫道不疑好黎明沐浴更衣跣跡而逝

元

趙友欽

宋瀟華象新書序鄱陽人或曰名敬字子恭或曰友欽其名弗能詳也世因其自號稱為

緣督先生習天官遁甲鈴式諸書一日坐芝山酒肆中逢修眉方瞳者索酒飲異而即之相與談元頗久出囊中九還七返丹書遺之臨別問姓名曰吾扶風石得之也自是往東海上獨居十年注周易數萬言復棄去乘青驪往來衢婺山水間旅中之費未嘗乏絕竟不知為何術倦遊而休泊然而

化葬於龍游之鷄鳴山名勝志緣督著有仙佛同
源金丹正理盟天錄諸篇今所存者華象新書而
已

周德清

弘治衢州府志女冠也元初人少於振塘洞
石溪遇異人咬以蘿蔔遂不食烟火夜不假

寢垂七十後尸解至
正間賜號靖應散人

世愚

兩浙名賢外錄西安人姓余氏母夢觀音送童
子而生天資超悟聞法便了日據禪牀而坐兀

如枯株當其研味寢食不覺偶聞證道歌豁然大
悟遂嗣止巖息影大慈山者十六年輪下常滿賜
號弘辨大師
有二陰語錄

明

張柏亭

兩浙名賢外錄西安人為元妙觀都記永樂間奉勅建武當山宮觀應詔住元天玉虛宮

時遇異人授以葫蘆拄杖各一常施藥并五雷正法救濟祈禱輒驗後還衡日跨青牛出入自號葫

蘆道人

柴用先

正德江山縣志號惟一子永樂間自京還至武林大旱自示能雷雨大書聯曰三日登壇

三日雨一聲號令一聲雷及期不雨衆且訶之用先乃散髮咒符叱官吏跪壇下須臾雷電交作大雨如注渰浸百里而西湖之水涸矣其族子壯得五雷秘法能祛邪治病祈晴雨大著靈異

無涯

弘治衢州府志族姓吳禮傑峯為師明禪教博通陰陽地理之書永樂五年召赴京師授僧錄

司右闡教賜金欄袈裟

非幻 正德江山縣志寶陀菴住僧諳儒書精地理嘗應召相地天壽山太宗奇之賜以金紫永樂十

八年遣使者祭其墓贈五官靈臺郎僧錄司右闡教

嚴州府

上古

桐君

名勝志上古有桐君者止於今縣東二里山隈桐樹下枝柯偃蓋蔭蔽數畝遠望如廬舍或有

問其姓者則指桐以示之因名其人為桐君其山亦曰桐君山或曰黃帝時嘗與巫彭同處方餌有藥錄一卷行世久而無傳

三國吳

陳惲

嚴陵志字子厚桐廬人富陽侯碩之子仕至黃門侍郎征寇將軍封餘杭侯有仙術能興水工

嘗於餘杭一夕築九里塘不假人力而成今桐廬南北二鄉多陳侯廟即惲也

唐

許宣平

續仙傳新定人景雲中負薪以賣常掛一花瓢及曲竹杖每醉行吟曰負薪朝出賣沽酒

日西歸時人莫問我穿雲入翠微好事者多誦其詩傳舍是處題之天寶中李白東遊覽詩嘆曰此仙人詩也五色線咸通中許明奴家嫗入山採樵見一人坐石上方食桃甚大謂嫗曰我許明奴之祖宣平與汝一桃食之不可將出嫗食桃後日漸童顏入山不歸行疾如飛

施肩吾

神仙通鑑字希聖睦之分水人家嚴陵七里瀨元和十五年登進士第太和自嚴陵入

西山訪道棲真初遇旌陽授以五種內丹訣及外丹神方後再遇洞賓傳內煉金液還丹大道於是終隱西山所為詩文甚多所傳未十之四白玉蟾跋施華陽文集云李真多以太乙刀圭火符之訣傳之鍾離權鍾離權傳之呂洞賓即施之師也施曾授上足李文英十六字世罕知者一靈妙有法界圓通離種種邊允執厥中予偶得之并以告胡棲真使補其遺云陸游修心鑑跋高祖太傅公嘗退朝見異人行空中足去地三尺許邀與俱歸則古仙人嵩山栖真施先生肩吾也因授煉丹辟穀之術

徐道士

嚴陵志唐末居清溪縣天樂觀年八十餘夢大羅天賜詩因白衆尸解而去

稠錫和尚

虎薈唐開元間稠錫禪師卓錫義興南嶽忽膝間嬰兒聲師曰有是緣哉即卓錫

而菴前稠木自開遂納衣服數種於內復卓錫而木合人號為稠錫和尚因下山得一婆婦遂留為偶生二子一日晨炊進羹妻辭以羹盡師笑曰非羹盡乃緣盡也復取衣錫歸寺衆誚不納一日偕一虎至僧衆怖走師招之曰勿怖今欲與汝輩決去留耳吾果不能住此虎當噉我如可再居此虎即繞身三匝言未已虎行如數衆俱請止菴前有池師隨剖腹洗腸而入演法集衆遂成大剎後飛錫至黃巖白龍山有神侍立其左右黃巖誌云師名清晏續大猷通考稠錫桐廬人

慧朗

高僧傳遂安人年二十有二至剡溪石城寺見一禪翁鶴髮冰膚目如流電同行十數里憩林

樹下指朗曰法常寂然何必隨遠宜歸本生度無量衆言畢求之無方豁然本心悟佛知見乃歸故里慧安寺一日秦望山林木振動俄有大龜呈質咸謂此何祥也時有禪僧曰誓自會稽雲門而來

身長八尺四寸高鼻大目睛光射人明大品思益
維摩等經衆曰神僧也大龜應乎此矣朗祕菩薩
行請為師誓徵維摩經義答曰如日照螢火海沃
牛跡誓深器之一夕忽覩神光從項而出旁燭山
川盈十數里誓由茲反拜請朗登座道俗欣然各
歎曰昔山之震動龜之效祥非誓公之應明矣開
元八年歙州長史許思恭請往治所朗
升法座熊伏於前聞鐘而來衆散而去

省躬

高僧傳桐廬人投聖德寺於毗尼道學時溫習
復擇名師得姑蘇開元道恒師恒曰吾得躬也
門人日益親晚赴維揚之名廣訓徒焉躬復高儒
學作碑頌極多以其會化邗溝故呼淮南記主自

號清冷

山沙門

少康

名勝志貞元中乞食睦州城中每得錢即誘小
兒念佛號一聲與以一錢因於高峯建道場集

衆念佛衆咸見佛出康口中坐化之
夕有光照烏龍山山色為之變白云

道明

五燈會元睦州陳氏子因往開元寺禮佛見僧
如故知歸白父母出家為僧持戒精嚴學通三

藏遊方契旨於黃蘗四衆請往觀音院常百餘衆
經數十載學者叩激隨問遽答詞語峻拔由是諸
方歸慕咸以尊宿稱後歸開元織蒲鞋以養母故
有陳蒲鞋之號巢寇入境師標大草屨於城門巢
欲棄之竭力不能舉嘆曰睦州有大聖人舍城而
去嚴陵志雲門林際禪宗兩派皆出於明故楊傑
為之頌曰指將林際叅黃蘗接得雲門
嗣雪峯宋元符三年錫號悟空禪師

五代

文益

萬歷嚴州府志俗姓魯餘杭人七歲依新定智
通院全偉禪師落髮具後三坐道場諸方叢林

咸遵風化釋氏稽古畧住建康清涼寺唐主邀師
觀牡丹花請師賦詩師應聲曰擁毳對芳叢由來
趣不同髮從今日白花似去年紅艷曳隨朝露馨
香逐晚風何須待零落然後始知空至周顯德五
年辭衆跣趺而逝勅謚大法眼禪師師嗣地藏琛
琛嗣元沙備備嗣雪峯禪師宗門尊仰其道曰法
眼宗

國朝雍正十二年奉
勅加封妙光法眼智藏禪師致祭一次

宋

孫道人

春渚紀聞居嚴州天慶觀初不挾術言人禍
福但袖中嘗畜十數白鼠每與人共飲酒酣

出鼠為戲人欲捕取即走投袖中了無見也約人
飲則就酒家市一小尊酌之不竭人告酒困即覆

尊而去酒家是日必大售紹興三年三月三日觀中士庶駢集道人拱坐告衆曰我今年九十歲暫當小別各勉力事善言訖坐逝一郡驚異瘞之城南而塑其像觀中歲餘有商手持書封題甚固云我去年三月三日於成都觀禊事遇一道人云我自嚴州來知予不久回浙幸為我達於天慶觀尋孫道人入觀見塑像驚禮之曰此我成都所見付書人也因共發其藏則空棺矣

唐廣真

續文獻通考嚴州女子既嫁得血疾夢道人與藥服而愈自是與夫相離從師修道淳熙

中在郭家食飯次若有人喚者出門逢三仙人引至海邊跨大蝦蟇渡海因隨遊名山仙人曰汝欲超凡入聖耶留形在世耶棄骨成仙耶對曰有母在願終養遂與丹一粒吞之自是不食米後召入德壽宮封寂靜凝神真人

葉梅卿

嚴陵志壽昌人號碧潭居士明春秋通史傳理宗朝任撫屬舍人後棄官家居習修煉導

養之法有異術能存神謁帝與諸神將會一日示偈云六十七年有身半生本分為人昨夜天官召

我明朝金闕朝尊

次日怡然而化

義澄

嚴陵志姓孫氏富陽人投新定龍門僧德詮出家宋咸平中真宗召至闕賜號明慧大師後還

錢塘以苦熱得疾作偈曰本來無質豈有去住要識真歸南來北去時年百二十八矣

道隆

五燈會元桐廬董氏子於鍾山寺得度自游方所至耆衲皆推重晚抵黃龍死心順世遂歸隱

鍾山慕陳尊宿高世之風掩關不事事日驚數隻自適人無識者手常穿一襪凡有禪者至提以示之曰老僧這襪著三十年了也有寺僧戲問如何是無諍三昧隆便掌之

法清

五燈會元嚴陵人嘗於池之天寧以伽黎覆頂而坐侍郎曾開問曰上座仙鄉甚處曰嚴州曰

與此間是同是別師披伽黎下地揖曰官人曾到嚴州否曾問措師曰待官人到嚴州時却向官人道

尹山僧

萬歷嚴州府志俗姓汪居淳安之梓桐鄉結庵於尹山之頂既示寂其徒以頂骨納琉璃

瓶中瘞之歲久欲遷葬夜夢僧指其處及得瓶腹大頸小頂骨依然莫知所從入人以為異至今里民水旱祈求多著靈異

善心

新定續志朱姓耕山誦佛遇亢暘常有雲覆之諾人以雨軌驗邑人指為活佛嚴陵志壽昌人

常一日至葉樞密家求山水衣其家曰無有朱曰在某園筍中良久又曰吾帶一小畜恐驚人當出

收之家人尾其後見一虎繫於府前之柏下葉見其靈異遂與之今繫虎柏猶存紹興二十九年留偈示化自焚其身至今野燒至此即滅春草不生人為立菴

元

錢九五

萬歷嚴州府志淳安人居蜀阜幼習五雷天心正法樵采山中有雷部神為孕婦所魔九五為之解釋得去因授以呼雷法時縣苦旱尹俾祈雨應禱而降往龍虎山受籙道逢二老對奕啖以數果精爽倍常命拔一松倒種之誓曰此松活則法可傳九五乃往及回則二老尚在而松固無恙也授以四石子戒勿啟頃之石子鐸鐸有聲啟之則雙蝶颺去僅存其二自後常有二神人呵護之今所居法水井猶存焉

紹大

稽古續集嚴之桐江人姓吳入鳳山寺祝法受具私曰化龍之魚肯以蹄涔求生乎謁雙徑大

辨陵公以單傳心印詰難久之復徧叅名宿知法之無異味也閱大藏教至三過通其旨趣出世景德寺詔住義烏寶林一時法席號為極盛有三會語錄桐江集行世

明

卜景雲

壽昌縣志壽昌人常居仙池巖習修煉之術洪武己酉夏嚴州早知府劉遵道徵至郡禱

雨輒應縣北牙吹塘水數泛溢占者以蛟為患縣迫之治雲囑其妻子曰速具棺吾其殆矣遂往初以紙劍投水水浸濁已而投以鐵劍水為之赤歸即臨鏡自書其像遂卒於家時人號為卜真人

邱駝

兩浙名賢外錄桐廬人病痿因以駝名家貧操舟濟渡不索人錢與之則受隔岸一道士暮夜

呼渡駝急就之無所見頃之又呼繼往又無所見
拔篙將行蹉跌而仆亦無怨言迨起則駝背已直
矣越數載歿舟中家人收殮久之隣人至衢州見
駝與道士同行疑洽若平時囑寄所穿鞋以歸又
貽之以屣令著之則行步如飛不日至家以鞋付
其妻視之故殮時物也回顧所貽屣化為雙鵲冲
天而去

孤舟

龍泉縣志嚴州人中年客浦城聞鏡公誦華嚴

為衆尤深於念佛三昧每教弟子以死心曰心若
死方能不惜身命不憚勞苦否則仍為三家村捋
黑豆俗僧耳崇禎己巳告衆曰佛成
道日我當訣別闔門念佛無疾而逝

溫州府

三國吳

朱孺子

續仙傳永嘉安固人幼師道士王元真居大

若巖常登山嶺採黃精服餌歷十餘年一日
就溪畔濯蔬見岸側二小花犬孺子異之乃尋逐
入枸杞叢中歸告元真遂與孺子俱往伺之復見
二犬戲躍逼之又入枸杞下元真與孺子共尋掘
乃得二枸杞根形如犬堅若石挈歸煮之孺子益
薪看火三日晝夜不離竈側試嘗汁味取吃不已
及根爛以告元真共取食之俄頃孺子忽飛在前
峯上謝別元真昇雲而去俗呼其峯為童子峯元
真後餌其根盡不知其年壽亦隱於巖之西陶山
有採捕者
時或見之

晉

劉根

仙家雜記字君安長安人隱永嘉飛霞洞嘗至天台赤城訪紫極君

謹按名勝志晉邑人劉根隱積穀山飛霞洞則根乃永嘉人也後漢書載劉根係潁川人不當混而

為一

唐

傅隱遙

兩浙名賢外錄永嘉人吳甘露初棄家為道士居石室山大若巖辟穀修煉至唐調露元

年丹成工昇游戲人間蓋四百餘載也今大若巖左有登仙石

左元澤

赤城志永嘉人性介不隨俗居王霄峯三年絕粒不語嘗製真一頌神仙通鑑元澤事方

瀛徐靈府因卜居香林峯石室中靈府愍其勤恪遂授以秘要溫州青嶂觀有土地祠里人嘗以血

食祀之苟祀不至則為崇元澤以杖筭神背翼日
有大狸死於庭一日忽謂主觀者曰某將他適請
置湯沐掩蓋日但隨香氣而去盡處則止是夕風
雨雷電交作將曉聞唱珍重聲往視之已化矣如
其言瘞之果得自然石壙

元覺

高僧傳字明道俗姓戴永嘉人總角出家住龍
興寺觀其寺傍別有勝境遂於巖下自構禪菴

居其間以獨學孤陋與東陽策禪師肩隨遊方詢
道謁韶陽能禪師而得旨焉既決所疑能留一宿
號曰一宿覺猶半徧青也先天二年於龍興別院
端坐入定殯於西山之陽覺唱道著明修證悟入
慶州刺史魏靖都
緝綴之號永嘉集

國朝雍正十一年
勅封洞明妙智禪師

元宗

高僧傳姓吳氏永嘉人少出家抵江陵辭朗禪師門決了疑貳復振錫紫金山山先多虎暴從

宗卜居哮閭絕迹一日見一老父趨及座前拜跪宗問何人答曰我本虎也在此山中食啖衆生因大師化此冥廻我心得脫業軀已生天道故來報謝折旋之項了無所見以大厯二年囑別門徒溘然而化春秋八十六

五代

晉光

高僧傳字登封姓吳氏永嘉人唐左庶子競之裔幼捨家於陶山寺剃度多作古調詩長於草

隸陸希聲謫官豫章光往謁之投其五指撥銓訣乃西上昭宗詔對御榻前書賜紫方袍歸甬東終焉弟子從瓌溫州僧正智琮皆得墨訣宣和書譜晉光潛心草字名重一時吳融司空圖皆稱美之

鴻宮

鴻楚

高僧傳姓唐氏永嘉人出家越州龍宮寺誦法華經得度往長安學律因讀化

度寺碑時有舉人旁聽見莒目瞻多行異之知能背誦覆具文了無一悞歸故鄉晝夜行道誦經有鬼神扶衛或為然燭或代添香弟鴻楚字方外武肅王錢氏於杭州龍興寺開度戒壇召楚足臨壇員數因奏薦梁祖賜紫衣并號固讓弗聽終不披著講法華經計五十許座一日講堂中忽生蓮花重跢複葉香氣芬馥以長慶三年無疾而化

德倫

十國春秋永嘉人世稱錐刀尊者常以錐刀自隨人有丐之者曰錐刀從我覓耶此刀墮地則

天下太平未幾忠懿王納土人以為驗相傳國城西河故德倫所鑿

願齊

方輿勝覽嘗與吳越王同參韶國師於天台遊永嘉禮智覺真身聞平陽明王峯頂有雁蕩山

天晴則鐘梵相聞杖錫尋訪喜曰此山水盡處龍
雁所居豈非西域書所謂諾詎羅震旦雁蕩龍湫

者耶遂結
茅其間

道愆

十國春秋字德順永嘉陳氏子六歲不茹葷親
黨強啖以枯魚輒吐去因薙髮於本州開元寺

既而抵閩謁雪峯禪師妙契宗旨時謂之小愆布
衲歸住東府鏡清寺倡雪峯之法學者奔湊副使
皮光業辭學弘麗屢擊難之退謂人曰愆師之高
論人莫窺其極也文穆王命主天龍寺後創龍冊
寺延請居焉天福初

示滅塔於龍冊山

清昱

五燈會元杭州奉先寺僧永嘉人忠懿王
召入問道創奉先居之署圓通妙覺禪師

宋

李少和

李建中李少和行狀永嘉人世居大羅山間白石洞為鬼墟曰吾嘗東望絳雲覆其上必

佳山也乃獨造其頂晏坐鬼神咸進太宗真宗屢召對賜予甚厚仍賜白石巖額天禧五年八月十八焚香危坐命門人取紙書曰寶珠探妙得真宗五色分明煥太空解下連環竟超越鬱羅深處宴鴻濛擲筆而逝

柯可崇

名勝志宋列真觀道士於七峯山絕頂築凌霄菴以居導引辟穀猛虎馴伏其傍

木葉老人

雁山志元豐五年瑞慶院僧道親於院前道上逢一老人自山而下履木葉皆無聲

呼僧與語付一丸藥如彈子曰爾可速入京師以此藥進上乃萬歲藤膏熬成龍壽丹也以金碗研服可保二九之數道親如其言至都下上聞召而取之命中臣梁從政賁香至雁蕩訪老人無所見

八年春上染疾太后得藥於睿思殿如前法研服之稍愈計在位一十八年適符二九之數

夏元鼎

席上腐談永嘉人號雲峯注陰符藥鏡悟真三書真西山為序萬厯溫州府志元鼎嘗登

南岳祝融峯遇赤城周真人授以丹法歸隱西山修煉後無疾端坐而逝是日鄉人在閩中者見之

寄書歸號西域真人

今其地名夏仙里云

朋彥

景德傳燈錄永嘉人姓秦氏本州開元寺受具初叅寶姿和尚歸於天台之室悟正法眼自此

隨緣闡法姑蘇節帥錢仁奉禮重創院請轉法輪建隆二年以往持付門人法齊繼世說法即其年

四月示滅

瓌省

景德傳燈錄溫州陶山人姓鄭氏幼出家棲心圓頓後閱楞嚴文理宏濬未能洞曉一夕夢日

輪自空降開口吞之自是倏然發悟差別義門渙然無滯開寶三年衢州刺史翁晟仰重師道乃開西山創大禪院請居之學者臻萃五年七月示疾集衆言別安坐而化

永安

高僧傳姓翁氏永嘉人後唐天成中結菴天台武肅王錢氏召居報恩寺署號禪師乃以華嚴

李論為會要將合經雕板印行每有檀施罕聞儲畜以宋開寶甲戌歲終焚之其舌存焉今藏普賢道場

丈輦

高僧傳永嘉平陽人往緡雲叅明招禪師未遇天台山德韶禪師唱宗一大師之道諦受無疑不為異緣牽轉嘗謂人曰悟人之緣猶蠖屈之於葉也食黃則身黃食蒼則身蒼其屈伸之狀無變吾初見明招乃如是今學元沙又如如此此所謂殊途而同歸今更取佛言為定量之乃覽大藏經三

周徧自是以來逍遙無滯太平興國三年忽自捺
斧伐檀巧結浮圖入內跌定自持火炬誓之曰以
此殘喘供養十方佛言訖發焰亘空具烟五色旋
轉氤氲猶聞誦經之聲須臾始絕灰寒拾舍利不
知其數

全了

雁山志永嘉人游山至荆門玉泉山遇天竺僧
言汝緣在浙東當得名山居之永嘉有諾詎羅
尊者道場數適當龍湫晏坐此尊者棲息地也
了遂感悟至山中結菴曰芙蓉塔曰古塔雁山之
顯皆全了發之為人
放蕩人目為了潚蕩

曉榮

景德傳燈錄温州人姓鄧氏幼依瑞鹿寺出家
登戒聞天台國師盛化遂入山叅禮受心法初
住杭州富陽淨福院後住龍冊寺二處皆聚徒開
法淳化庚寅於秀州之靈光寺淨土院歸寂壽七

十

遇安

指月錄住溫州瑞鹿寺師事天台閱首楞嚴經悟旨時謂之安楞嚴至道元年春示寂

本先

僧寶傳姓鄭氏永嘉人年二十五為沙彌詣天台國清寺受滿分戒即造韶國師服勤十年住

瑞鹿寺足不歷城邑誨誘門弟子踰三十年其志彌厲大中祥符元年二月謂門弟子如畫曰為我造塔塔成我行矣八月望日畢工是日如平居至午時坐方丈手結寶印奄然開一目微視而寂如畫奉其所著竹林集十卷詣闕上進詔藏秘閣如畫賜紫衣

義懷

佛祖通載姓陳氏樂清人世以漁為業父得魚付懷私投江中父怒答詬不以介意長遊京師

依景德寺試經得度東遊洞庭翠峯懷當營炊自汲澗折擔悟旨顯公印可辭去自鐵佛至天衣五

遷法席晚以疾居池州杉山菴弟子智才住杭之
佛日迎歸養侍問如何是畢竟事懷豎拳示之遂

倒臥推
枕而化

國朝雍正十二年
勅封圓湛振宗禪師致祭一次

信南

名勝志白鶴寺僧景祐二年詣都上郊禮頌表
乞藏經許之因進聖德詩賦賜對訪以鄉里答

曰臣所居乃王子晉吹簫之地張文君入竹之鄉
上曰是樂成僧也賜號大英大師仍賜大藏經及
三朝御
書以歸

懷賢

泰觀圓通禪師行狀字潛道俗姓何氏永嘉人
郡之西山有僧嗣仁修西方白蓮淨觀號嗣仁

社主乃從出家天禧二年落髮受具時年四歲及
長辭社主去遍叅知識最後見達觀禪師曇穎於

潤之因聖遂得其法皇祐初開堂於郡之瑞竹院達觀自明州雪竇徙金山之龍游會示寂郡守請師繼焉積八年殿堂廊廡皆具宮室之盛冠於淮海熙寧元年遂謝去隱於金牛山元豐五年九月示寂葬金牛之西壠

士珪

緒傳燈錄成都史氏子政和末出世禾之天寧屢遷名剎紹興間奉詔開山雁蕩能仁具徒懼

行歸法深夜放火鞠為瓦礫之墟師竟就樹縛屋墜座示衆云愛閒不打鼓山鼓投老來看雁蕩山傑閣危樓渾不見溪邊茅屋兩三間聽法壇施并力營建未幾復成寶坊

宗覺

處嚴

名勝志樂清明慶院僧宗覺戒律甚嚴持誦經咒應驗如響宣和間為寇所追

墮於層崖之下振衣而起了無傷損尤善文章所著有蕭峯集處嚴博涉能詩文寺碑多出其筆翰

墨亦臻妙品所著有潛澗集王十朋將產其母夢
嚴來惠以金環夢覺而嚴適坐化遂產十朋紹興
間十朋道經石橋寺僧先夢迎嚴和尚詰旦而
十朋至故其詩云人喚我為嚴首座前身曾寫石
橋碑萬厯温州府志宗覺字無象

樂清下岐鄭氏子處嚴姓賈氏

清了

江心寺志字真歇西蜀左綿人俗姓雍少出家
謁丹霞淳禪師後遊五臺抵長蘆謁照禪師一

語頓契照付衣嗣豫備布袈裟於袖起示衆曰得
法丹霞老傳衣祖照庭思深祇無語懷抱自分明
宋紹興七年奉詔開山本寺以龍翔併興慶
為一後開山臯亭及寂化謚曰悟空了禪師

景元

羅湖野錄台州護國元禪師叅園悟於蔣山因
僧讀死心小參語云既迷須得悟既悟須識悟

中迷迷中悟迷悟兩忘却從無迷悟處建立一切
法元聞而疑即趨佛殿以手托開門扉豁然大徹

續文獻通考永嘉人參蔣山圓悟有得悟曰我這裏禪都被元首座作一布袋盛去了一時衲子呼

為元
布袋

景宣

雁山志樂清人陳氏子受業能仁寺十五歲試經得度出遊方外紹興間歸能仁越數年又居本覺平生喜讀莊子自為注解凡三十三卷又能究極性命道德之說年九十七雙目炯然視聽不衰及荼毘齒與袈裟皆不壞人以為得道云

後可

續文獻通考雁蕩雙峯寺僧善講經一日聚眾僧講於峯下有一老人侍聽長鬚古顏眾異之問其從來曰某寒坑龍也眾曰寒坑去此百餘里講不踰時何從知之而遽至此曰寒坑雁蕩原是一山首尾相連地脉相通故易知之因忽不見風雷驟起仰而視之則蜿蜒之狀已在雲中矣

介謚

五燈會元溫州張氏子萬歷溫州府志受具於崇德寺慧微師微持律刻苦嘗然身為燈作佛

事謚曰大丈夫當明佛祖意以光明照大千何區區於此辭往謁徑山常悟佛鑑慧勤晚依長靈守卓悉得其道性剛毅泣衆有古法時以謚鐵面稱之號無示禪

元

周恢

萬歷溫州府志字復元瑞安人幼習舉子業宋末避亂青田山中從蔣梅莊受元學居雁蕩一

日遇髻角道人坐場山茅舍酣歌恢前致禮弗顧夜宿其傍見道人兩目光各丈餘俄合為一及曙恢市酒酌道人道人持滿呼飲之覺神爽體輕須臾又一道人至曰此冲應葛仙翁也可拜而師之恢如言仙翁出書一帙俾錄之仍授密印由是飛神上下去來無碍不啖烟火者四十二年泰定丁

卯三月索紙筆書曰混合元宗七十六年時來果熟撒手高眠紫雲匝地黃鶴彌天奄然而逝

周頤真

兩浙名賢外錄字養元永嘉人遇西蜀異人授以隱書及壬遁反閉之術因自號山雷子

元統甲戌歲旱郡請禱雨頤真默運神機電出袖中雷雨隨至所著有洞浮老人集

梅芹

萬厯溫州府志永嘉人元末不樂仕韜跡黃冠能驅鬼出神或盜其邱木芹焚符竈中盜者披

髮負樹來歸以水啖之謝而去嘗自題小像曰石斛花開劫外春百城烟水漫勞神誰將秋兔毫端寫貌出山林幻有

身自號大歇子

了万

續傳燈錄臨川金氏從金溪常樂院思仁者祝髮東叟領南屏禪師掌記遂蒙印可後遊天台

及境衆請開法寒巖竟嗣東叟踰三年遷仙居紫葢厯十載遷疎山又十年升住江心廬山月澗明

公遣舟迎歸東溪皇

慶元年書訣坐逝

省

初萬歷溫州府志永嘉孫氏子號子蒙自幼端謹為儲慶寺僧長師方巖於台州白蓮寺遠接南

屏之傳弘天台教觀歷雙峯上天竺
首住東林開元兩刹著五門禪一卷

明

顧泰真

萬歷溫州府志號虛白遇麻衣道人授掌心雷法能指呼暘雨叱咤風雷洪武十九年夏

早請禱於寶勝寺登壇雷電交作大雨三日乃止
一日赴醮金鄉謂弟子曰辰年巳月酉日子時吾

將化矣至期沐浴端坐而逝

葉昌齡

永嘉縣志幼機警遇老叟引入巖壑中若仙洞然教以正一五雷之法正德間郡大旱守

禮請之乃出登壇問曰欲城中雨乎守曰雨以既
苗願注城外齡乃以墨筆於紙上作一團旁亂點
如雨已而擲筆空中俄見白氣上衝
雷電交作城中僅飛灑而四郊大沛

張日惺

溫州府志號太微居白鶴山雙瀑潭側學法
於龍虎山嘗禱雨烈日中戒侍者宣疏畢亟

匿案下忽黑雲一朵如元芝從海門
起怒雷激之大雨如注時稱張法官

智順

獻徵錄字逆川瑞安陳氏子母塑智者大師像
一夕夢僧頂有圓光逆江流而上謂吾當為汝

子寤而有娠生子稍長受戒於天寧禪院走闕之
天寶山樞公授以心要返永嘉會王槐卿造報恩
院於瑞安大龍山首延師為之主叅徒寢盛石室
巖禪師主江心艷師之為復以第一座處師未幾
又以何山精舍棟宇湫溢拓之為大伽藍建大雄
寶殿平陽吳德大創歸源寺援報恩例請師開山

朝廷為降院額賜師號及金襴法衣鐘山建無遮法會師與其列升座演說聽者數千人竣事振錫往淨慈會中朝徵有道僧以備顧問衆咸推師師至南京僅四閱月沐浴書偈而逝有五會語若干卷善財五十三參偈一卷傳世

慧照

稽古續集字大千永嘉麻氏出世於明慶遷四明之寶陀常垂三關語以驗學者後築室曰夢

菴壽八十五有語錄行世又時蔚號萬峯永嘉人金姓謁虎跑止巖請益為堂中第一座

曇旭

江心寺志字旦初安固林氏年十四遊仙巖依珽公研窮教典尋住持壽昌能仁寺宣德中檄

主江心寺服修行業書偈而逝

國朝

行幟

舊浙江通志字法幢瑞安人姓林名增志崇禎

戊辰

進士

官中允

後薙髮

為僧

居呂峯

山徒

密

印

未入

大梅

山訪

梅子

真遺跡

披茸

剪荆

新唐

僧法

乙

常

舊觀

越六

載復

還

東甌

示寂

於密

印

印

東甌示寂於密印

處州府

漢

徐來勒

衆仙記為太極真人治枯蒼山兩浙名賢外

錄

來勒

得道

上昇

至東

漢為

太極

法師

莊職

洞天總司水旱罪福之籍唐天寶七年有慶雲覆

洞太

史奏

有真

氣見

於台

宿詔

建洞

宮榜

曰成

德

元隱

王遠

神仙傳字方平東海人舉孝廉歷中散大夫博士學五經兼明天文圖讖河洛之要漢桓帝累徵

不出使郡國逼載詣京師題宮門扇四百餘字皆紀方來帝使人削之外字去內字復見墨皆徹入木裏同郡故太尉陳耽為方平架道室願從學道在耽家三十餘年後化去衣帶不解如蛇蛻也嘗東入括蒼山過吳住胥門蔡經家

左慈

列仙傳字元放廬江人明五經通星象學道精思於天柱山得石室中九升金液經是太清中

經法也曹操聞而召之問學道之由慈不答操怒欲殺之乃為置酒俄失慈建安末渡江尋山入洞在小括山顏色甚好名勝志小括山在處州府城西真誥以為左慈元放所治

戴火仙

名勝志漢時道士於留明山修煉道成陽精畢露於頂夜輒照徹山中若太陽然道士無

姓名人但呼為戴火
仙因立戴火仙廟

三國吳

榭衣仙

兩浙名賢外錄龍泉人不知姓氏無寒暑皆綴榭葉為衣人遂以是名之結菴於鳳山之

巔童顏黑髮不御飲食赤鳥中坐菴前槐樹上俄祥雲四合仙樂鳴空遂飛昇去

晉

平仲節

真誥河中人渡江入括蒼山受師宋君存心鏡之道積四十五年身形更少體有真炁五

月一日乘雲駕龍白日

昇舉今在滄浪雲臺

隋

尹真人

括蒼彙紀大業中煉丹遂昌百丈巖溪西山丹成舉家上昇今勝因院其故宅也迨宋龔侍郎原作勝因院記頗詳其事後原守揚州時有道入謁原題疏欲得錢萬貫原如數與之道人至和州創宅買田置器具交易標記悉作龔侍郎名字後原謫和州道人來請入宅云田土器具皆公揚州捨錢所置或云道人即尹真人也報其為勝因院作記也

唐

葉法善

舊唐書本傳括州括蒼縣人少傳符籙尤能厭劾鬼神顯慶中徵詣京師高宗廣徵諸方道術之士合煉黃白法善上言金丹難就徒費財物有虧政理請覈其真偽帝然其言又嘗於東都凌空觀設壇醮祭城中士女競往觀之俄頃數十人自投火中觀者大驚救之而免法善曰此皆魅

病為我法所攝耳問之果然自高宗則天中宗厯五十年數名入禁中先天二年拜鴻臚卿封越國公仍為道士止於京師之景龍觀卒於開元庚子凡一百七歲贈越州都督珍珠船明皇用法善術上元夜自上陽宮往西涼州觀燈以鐵如意質酒而還遣使者取之不誣名勝志李邕為處州刺史法善求為其祖國重作碑文文成又請書不許一夕夢法善請曰向辱雄文光賁泉壤敢再求書邕喜而為書未竟鐘鳴夢覺法善持墨本往謝邕驚曰始以為夢乃真耶今稱追覓碑云

劉處靜

仙都志字道遊彭城人其先避地遂昌因家焉遇異人授以吐納之道嘗召見賜緋衣退

居仙都山隱真巖結廬金龍洞側門人欲塑其像一日有嗜酒道人來成之處靜畱飲旬日以黃金三千銖贈其行相送金龍洞前及回得片紙書云子與吾金吾授以真真抱子形形全於神十六字

裏原金在焉於是頓悟遂豫築元壚於廬後
自謨其志咸通十四年六月辛酉日解化

吳善經

天台山方外志縉雲仙都山人年十七為道士
編登匡廬天台三茅元和甲午八月十三

日羽化權德輿撰太清
三洞法師吳先生碑

羊惛

續仙傳太山人家縉雲明經擢第授夾江縣尉
罷歸棲括蒼山遊阮郎亭一日於亭側與縉雲

館道士數人花時飲酒日午忽仆地昇還家七日
方醒問之曰初為一人青續絳服自稱靈英邀入
洞府須臾一石穴中有物飛出狀如蜃青色柄長
靈英指之曰此青靈芝也食之得仙惛取食之味
甘美靈英乃引見仙官戴遠遊冠霞帔三人文武
侍從極多靈英謂惛曰一小有天王君一華陽大
茅君一隱元天佐命君惛歷拜之咸曰有仙骨未
能飛昇猶宜地上修煉俄而靈英送出乃括蒼洞

西門也後不喜穀氣但飲水三升日食百合一盞
身輕骨節皆動抖擻如竹片及拍板聲又數年南
行入委羽山
人莫得見

杜光庭

宣和書譜字賓聖號東瀛子括蒼人懿宗設
萬言科選士光庭試其藝不中乃棄儒入道

著道家書頗研極至理條列科教自漢張道陵暨
陸修靜撰集以來始末備盡羽流咸宗僖宗臨御
光庭充麟德殿文章應制一時流輩為之斂衽嘗
撰混元圖紀聖賦廣聖義歷帝紀暨歌詩雜文百
餘卷喜自錄所為詩文而字皆楷書人爭得之一
日忽謂門人曰青城方創真宮工未畢上帝命我
作岷峨主司恐不久於世他日復謂真宮成矣遂
披法服與門弟子別而卒神仙通鑑蜀主王建初
賜號廣德先生
進號廣成先生

周景復

仙都志仙都道士唐大厯間居仙水洞辟穀宴坐百有餘年後仙去

葉藏質

神仙通鑑字舍象處州松陽人法善之裔詣天台馮惟良授三洞經籙於玉霄峯選勝創

道齋號石門山居日誦道德度人二經晚年尤精符術請之者如織婺州牧為邪物所撓詣請符因焚香置匣捧歸崇物遂絕唐懿宗優詔石門山居為玉霄觀忽命酒召其友應夷節同飲語及生平事然後告以行日及期題於門曰鷄鳴時去門人聞珠珮雜鼓樂聲於空中須臾鷄鳴觀之已化矣

年七十四

智威

高僧傳姓蔣氏縉雲人聞天台宗教遂往沃州石城寺親灌頂禪師求請心要著桃巖寺碑與

頭陀寺碑氣度相表後以法眼付授慧威威姓畱氏東陽人總角之年徑入空門聞縉雲大威禪師

盛行禪法裏粮造焉時謂小威佛祖統紀貞觀二十
年詔法華智威禪師補四大師朝散大夫威前

身是陳僕

射徐陵也

有緣

高僧傳俗姓馮東川梓潼人往成都福感寺事
定蘭開士即宣宗師一日宣召帝以筆書其衫

背云此童子與朕有緣乾符三年至縉雲龍泉大
賽山立院因奏祠部給額號龍安勅度七僧住十
八載止連雲院太守盧約請入開
元寺別院天祐丁卯四月示疾終

周南

續文獻通考遂昌人號知常叟壯年謝
棄鄉里學仙不成去學佛以易成名

三平和尚

括蒼梁紀唐中和間築精廬於南明山是
為大安寺每日騎虎出山至溪津叱虎還

徒步入城虎出候於溪載還山以為常明一統志
有真身塑像在麗水大安院有破衲若蟬翼藕絲

其徒
實之

明覺

兩浙名賢外錄麗水人住南明山雪竇禪師頌
之曰三界無法何處求心白雲為蓋流水作琴

一曲二曲無人會雨過夜堂秋水深時有解脫和
尚者亦住南明當月夜靜坐依華嚴經入佛光定
感化佛出現由是悟入三摩地辯才無對
當時禪學之士皆言法中義虎南明有二

守約

括蒼彙紀麗水人誦法華經有悟人稱之曰約
法華晚住天台護法院嘗夜歸守門行者夢伽

藍神呼之覺曰佛歸起開門師
適及門寺僧咸異之後跌坐化

五代

鶴衣道人

十國春秋不知何郡縣人亦無姓名日醉
臥處州鳳凰山下忽為里婦所詬辱道人

嘆衣為鶴跨之而去竟莫知其何術後
人建祠祀之即今報恩光孝宮是也

馬氏二女

兩浙名賢外錄慶元人姊妹及笄父母將
嫁之不肯問其故曰紅顏易老吾欲以金

丹駐之耳遂結廬於百丈山頭每夜輒登山石上
焚香求度世忽感真人密授口訣姊妹按法修煉
丹成俱白日乘鸞飛去至
今山巔有剪刀鏡臺遺跡

宋

梵公

名勝志慶元人為邑皂隸邑令刑峻梵用葱頭
貯血匿杖中行杖見血刑者多因得活一日令

見梵行不履地詢知其陰德大異之遂去修
煉山中功成以石臼千觔為冠登山岡羽化

黃十公

括蒼棠紀慶元下管人樵於仙桃山見二叟
對奕得餘桃啖之觀奕未竟歸已三載遂居

百花巖二十
年後坐化

盧仲璠

虞集紫虛觀記仲璠徧遊名山歸終茲觀秩秩有條理乾道丙戌之歲年八十一乃召其徒告之曰數至九九而極矣吾將返於數之所不及也揮手謝衆即坐化去

章思廉

虞集紫虛觀記名居簡以字行父景陽故儒家旁通方外之學思廉師王清烈於觀中授

靈寶經每日望太陽吐納遂不語不食久之暑不揮汗寒不襲衣或坐立凝然不動者通夕行步如奔馬而塵不驚人各從其東西行皆若與思廉面語及合而即之則一思廉耳觀主嘗書火字微衆取筆改火為水未幾山水大至而水所過處土去石存巖穴若厦屋思廉常遊戲焉有進士從思廉問應舉當得否思廉不對而與議論輒及經義及試得題思廉所與語者用其說中高等故儒家亦

信之郡守錢竽有從父因竽求見思廉望見遽呼曰大資後果官至資政殿大學士其劾治鬼物已疾苦尤效自達官貴人至里巷莫不神明之歿之日肌骨柔潤云

徐泰定

劉基紫虛觀記泰定嘗遇一道人口吹雙笛授以丹訣仍贈筆一枝令作水墨山水隨意

為之遂如素習後十年欲與遠遊泰定辭乃畱詩別去鐵笛雙吹破曉烟相逢又是十年前曾將物外無窮意總付毫端不盡傳白髮數莖君老矣青雲一片我飄然世間究竟只如此何似同歸洞府天泰定年八十餘端坐而化

葉文詩

兩浙名賢外錄麗水人嗜酒善詩畫山水人物閉戶輒累月不出出則羣兒環之或與之

錢與之衣則悉與路人寶祐甲寅十二月嚴寒浴於觀池擲其衣獨臂二草履作偈端坐而逝

范子珉

續文獻通考處州道士嗜酒落魄談人意外事多奇中善畫牛往訪郡守錢杲曰負公畫

四軸故來相償畫成即逝將斂得片紙於席間書曰庚申日天帝詔范子珉

清辨

括蒼景紀宣平人宋乾德間得道於烏巖寺每騎虎下山創淨妙寺工畢其虎悞為鄉人所殺

後知為禪師虎自悔捨田十餘畝入寺償之至今寺有償虎田

癡海

括蒼景紀龍泉人崇因寺僧性多騷故號為癡海耳無垂珠唇不蓋齒其師曰汝貌陋福薄宜

自勉癡海感其言日至東廊觀音堂焚香百拜每一拜以手禱落其唇并耳三年不怠不覺上唇下垂兩耳及肩忽夢所拜觀音垂手摩其頂曰賜汝聰明福相寤覺心境廓然遂通諸部經典後著金山水陸儀文盛行於世永嘉江心寺碑具手筆也

曇法師

括蒼景紀瑞安人居青田之慈仁院出入禪機尤善吟咏每一月或半月不火食人異之

秦少游謫處州時與曇相與最篤後去留別詩曰緣盡山城且北歸此生相見定難期寶池異日蓮

花上却說如

今結社時

從諫

五燈會元天竺慈辨講師處之松陽人具大知見聲播講席於止觀深有所契嘗以道力叩大

通通一日作書寄之師發緘觀黑白二圓相乃悟答偈曰黑相白相擔枷過狀了不了今無風起浪

若問究竟事如何

洞庭山在太湖上

了翁

縉雲縣志箬川人生而異香馥郁左手文有陳字長為慈相寺僧後住臨安陳寺行高潔人有

疾者以水溼地泉即時湧出人飲即愈徽宗賜袈裟錫此號

立禪師

指月錄處州人住法海寺徽宗革本寺作神霄宮師陞座謂衆曰都緣未徹所以說是說

非蓋為不真便乃分彼分此我身尚且不有身外
烏足道哉今更僧寺作神霄佛頭添個冠兒有何
不可山僧不免橫擔拄杖高掛鉢囊向無縫塔中
安身立命於無根樹下嘯月吟風然雖如此且道
山僧轉身一句作麼生道擲下拂子竟爾趨寂郡守具奏詔仍改寺額曰真身

崇岳

陸游岳禪師塔銘龍泉松源吳氏年二十三棄家受五戒於天明寺首造靈石妙禪師繼見大

慧果禪師於徑山大慧稱蔣山應菴華公為人徑捷師聞之不待旦而行既至朝夕咨請應庵大喜以為法器隆興二年浮海入閩見乾元木庵永禪師逾年見密庵於衢之西山隨問即答密庵微笑曰黃楊禪爾密庵移往蔣山華藏徑山皆從之又遷靈隱遂命師為堂中第一座旋出世於平江澄

照為密庵嗣慶元丁巳適靈隱虛席被旨居六年
道盛行法席為一時冠退居東菴屬微疾跣趺而
寂塔於北
高峯之原

元

趙嗣祺

仙都志字虛一龍泉人幼學道玉虛既壯遍
遊名山再參南谷杜真人觀光上國欽受宣

命賜印視五品後住湖州計籌山昇元觀平江白
鶴觀錫號元明通道虛一先生教門真士至元庚
辰冬解化於白鶴

藏劍履於計籌

劉德劬

括蒼彙紀字雲心麗水人學道於妙成觀善
鼓琴賦詩精意元修郡有疾病水旱必禱之

謝遺俱惠貧者平居無身外貲眉間有七黑子若
北斗狀至正庚寅年八十八沐浴坐於正室索筆

書偈奄
然而逝

以

假括蒼彙紀號空中樓禪於白雲山四方之侶聞風來赴屨滿戶外至元丙子夏一日援筆書偈

曰地火水風仙佛記掘地深埋第一義一免檀那幾片柴二免人言無舍利跣趺而化

本覺

兩浙名賢外錄龍象人博學能詩文士大夫多與唱酬嘗纂輯名僧諸書成編年由釋迦至達摩迄宋凡三教通於佛者靡不載題曰釋氏通鑑

明

潘自然

崇禎處州府志明初人為松陽逍遙觀道士居雲巖名勝志自然能召風雷神將每夜輒

有神燈懸其門有老人為之服役偶一日自然外出有求符者情辭迫切而治爨老人遽呼神將承

命往治自然歸責此老人忽見泥塑滕申君詣前
曰彼五世法官偶有過上帝謫之為君治庖君僅
三世不得責彼
語畢仍退復位

梁貞

蘇伯衡梁道士傳字松間麗水人八歲喪父母
十二投紫陽觀為道士六年不見道入元妙觀

事希元迄傳其道集賢大學士薦於朝得處州路
元妙觀住持提點郡嘗天旱長吏禱且兩月終不
雨詣貞請禱當午日炎炎俄陰雲四合雷電風雨
大作三日乃止咸以為貞所致貞曰我豈能致雨
雨適與醮會耳貞既出家惟一兄五十不娶貞涕
泣勸其兄兄乃肯娶貞罄橐中金為兄娶婦連得
二子

智度

稽古續集號白雲麗水人族姓吳年十五投禪
智寺空中假公難染受具深習禪定達旦不寐

者三載於白雲山築舊福林院以居閱楞嚴圖覺
二經與毒種曇光成山欽公互相策勵洪武二年
詔天下名僧師豫焉還居虎跑復趨華頂是
年二月微疾回至福林沐浴易衣書偈而逝

道涓

括蒼彙紀正統間為龍泉縣僧會駐錫鰲峯崇
因禪寺景泰庚午正月辭別鄉里回山告衆端

坐雷音堂遺偈云觀世間八十一一即是三三即
是一團圞燦破去來踪白日虛空轟霹靂偈畢而
逝鼻出雙筋光瑩
如玉時年八十一



浙江通志卷二百一

欽定四庫全書

史部

浙江通志卷二百二

詳校官給事中臣戴璐

檢討臣德生覆勘

總校官編修臣倉聖脉

校對官庶吉士臣潘庭筠

謄錄監生臣李崇實

欽定四庫全書

浙江通志卷二百二

列女

禮記內則首曰后王降德於兆民則室家之範闕乎風教審矣

聖朝明章婦順凡貞淑不貳操者雖極之掘門窮巷日月逾遠莫不搜幽夜之逸光登之坊表而風聲所樹至於心松筠竹簡不絕書蓋其盛也為列而次

之而載於前史公於舊乘者亦備錄焉志列女

杭州府

三國吳

錢塘縣

孫堅妻吳氏

三國吳志本傳吳主權母也本吳人徙錢塘早失父母與弟景居堅間具才貌

欲娶之吳氏親族嫌堅輕狡將拒焉堅甚慙恨夫人謂親戚曰何愛一女以取禍乎如有不遇命也遂許為婚生四男一女及權少年統業夫人助治軍國甚有補益建安七年臨薨引見張昭等屬以後事合葬高陵三國志注策功曹魏騰以逆意見謹將殺之士大夫憂恐計無所出夫人乃倚大井

而謂策曰汝新造江南其事未集方當優賢禮士
捨過錄功魏功曹在公盡規汝今日殺之則明日
人皆叛汝吾不忍見禍之及當先投此井
中耳策大驚釋騰夫人智畧類皆如此

唐

馮孝女

咸淳臨安志穆宗時人少孤無兄弟母子相依及長不嫁以養母母病篤思肉食刲股為

糜以進後母死號慟嘔血既葬結草廬墓下日焚香蔬食刺臂血書佛經捨宅為寺以薦母長慶三年詔賜束帛仍賜寺額曰報恩
今錢塘縣有孝女南北兩鄉

唐醜娘

夢梁錄居孝女南鄉年十三母病刲腹取肝和粥以進母病愈醜娘以創入風而死

謹按醜娘未詳何代人因與馮孝女居相近故連及之

元

輝和爾氏三女

元火本傳家錢塘諸兄遠仕不歸母思之疾三女欲慰母意乃共斷髮誓天終

身不嫁以養母同力侍護四十餘年母竟以壽終事上並賜旌異

楊居寬妻馬氏

元明善節婦馬氏傳參知政事楊居寬繼室錢塘民家女也至元十四年

僧格誣居寬等死沒入其孥以氏賜衛士氏託狂疾叫呼遺糞溺不可近竟免侵迫楊氏陰贖之歸遂削髮廬墓誓死不嫁後僧格敗事得昭雪而氏以無子乞歸錢塘養其獨親楊氏許之日紡績給食凡十有餘年大德七年十月乳生瘍或曰當迎醫不爾且危氏曰吾楊氏寡婦也寧死此疾不可令男子見竟死年四十餘

陳孝女

癸辛雜識父業儒居胭脂嶺下乙亥兵火挈家永嘉山中為盜所掠僅留一女十歲攜之

丐食以歸故居蕩不復存聞殊勝寺設粥攜女就食僧憐之留供榜疏職時孫元帥下李知事者東平人也欲延一士為友僧以陳薦一見投合館穀加厚女亦得其室之撫誨時屈仲春女謂其父云吾母墓在故居久不拜埽矣今值禁烟當一往祭奠父即備牲醴與俱至墓所拜奠罷女悲甚哽咽父勉之還則泣告曰比聞李氏將北歸吾父子必將從之父老子幼南北萬里何日得再至吾母墓下所以痛心遂擗踊呼號聲振林木久而仆地視之死矣因殮而祔於母塚之傍

曹處女

詩話類編名雪字玉英年十三善鼓琴十五工詞翰母沒竭力以葬其母年五十不嫁自

誓云死作處女塚至正間錢塘喪亂處女閉戶不食數日餓死楊廉夫弔之詩

都納

輟耕錄杭城東輝和爾氏女奴也年十九勤敏謹愿主卒某郡官所都納奉主婦日謹主婦亦

委以腹心至正壬辰秋寇陷杭劫官民府庫至輝和氏家不得物乃反接主婦柱下拔刀礪頸上諸侍婢皆散走都納獨以身覆主婦請代死且告曰將軍利吾財豈利殺人哉家之貨寶皆我所藏主母固弗知若免主母我當悉與將軍寇允解主母縛乃探金幣帛等散置堂上寇取之竟又欲犯都納身都納持刀欲自屠曰我主二千石我誓不奴他姓况汝賊乎寇驚異捨而去都納泣拜主婦曰棄主貨全主命權也妾受命主鑰今失貨而全身非義也請從此死遂自殺

黃仲起妻朱氏

元史本傳杭州人至正十六年張士誠寇杭州其女臨安奴倉皇言曰賊

至矣我別母求一死也俄而賊驅諸婦至其家且指朱氏母子曰為我看守日暮我當至朱懼受辱

遂與女俱縊死妾馮氏見其母子俱死嘆曰我生何為徒受辱耳亦自縊死既而仲起弟妻蔡氏抱幼子與乳母湯氏皆自縊賊至見諸屍滿室執仲起將殺之哀求得脫遂盡掠其家財而去

夏仁壽妻徐氏

徐一夔夏君墓誌仁壽配徐氏值寇難死於水以貞節聞

翁氏姊

西湖遊覽志餘年四十不嫁至正間寇陷錢塘與弟忠一家四人誓結袂死於河姊曰河

之死者穢矣吾獨尋乾淨水死忠等赴河姊赴城陰古井死楊廉夫弔之詩

周仲賓妻鄒氏

武林紀事鄒世聞女嫁錢塘周仲賓為贛之瑞金簿非辜就逮鄒氏嘆曰

夫必死矣吾出門安從遂投舍後池中而死

明

席祥妻吳氏

徐一夔席孝婦傳山陰席祥娶錢塘吳氏留錢塘生子未晬而祥沒吳年二十

有六曰吾席婦也義不當留父母家惟奉靈櫬葬先塋之次事舅姑以撫吾遺嬰至於成人耳他無所用其心也已而一如所言一日姑患瘍痛甚醫者曰此為膿所苦有能吮之者乎吳氏吮之無難

色姑

遂愈

胡氏守貞

兩浙名賢錄胡宗信之姊父母長弟相繼物故而宗信年幼未立私念嫁蚤晚無加

損誠能輔弟樹立晚嫁無所恨遂經紀其家及宗信長娶婦王氏名志清甫五年而宗信沒王時年二十四生子貢暨一女守貞痛曰我終不可以嫁矣於是與志清誓死守存胡氏血食臥起相依貧無以為生每日闔門治女事寒機雙杼一燈欲滅坐至夜分如此者十九年洪武甲子歲守貞年六

十卒志清率

貢行三年喪

陳貞女

兩浙名賢錄許聘禮部員外郎孫迪未成婚而迪亡樞返女告其父母哀麻至迪家見翁

姑臨柩伏哭盡哀還服三年喪終身不嫁壽踰七十卒於家

張景忠妻陳氏

成化杭州府志字文婉生一子孩抱而景忠卒甫除服有諷其改志者唾

去之舅姑沒喪葬貧儉稱禮姻族稱孝

包謙妻鄭氏

兩浙名賢錄陝西臨潼人父任杭府稅課大使擇錢塘包謙歸之謙舉進士授

行人卒於京師鄭時年二十六父聞命子至京迎回臨潼遺孤光弼方五歲氏泣曰予歸侍父兄即包氏宗祀絕矣遂扶柩還杭家屢空勤女紅以自給課子讀書焚膏盈勺竟始就寢誦讀稍怠即抱

謙神主哭子亦奮勵應明經選官
貴池縣學訓導鄭年八十三卒

徐泰皓妻陳氏

兩浙名賢錄名妙善年二十歸泰皓
越三年泰皓死無子以徐氏宗祧為

念勸翁納副室生子嵩妙善慮其孱弱且翁年近
七旬盡心撫養以至成立徐氏之宗賴以不絕嵩
感嫂恩以母事之及卒嵩
行三年喪君子以為宜

華榮妻王氏

萬厯杭州府志年二十歸杭州右衛千
戶華榮為繼室越五年榮死遺孤幼矢

志守節至老不渝終日蔬素雖鹽醢
不以入口弘治年旌表年九十二

華氏妙清

兩浙名賢錄杭州右衛千戶榮之女早歲
喪母茹素十餘年坐臥儼思恒若有見初

榮代伯氏戍彭城永樂間累功拜前官臨沒語女
曰吾起戰陣出萬死得一生為千夫長期世世及

也今中道死子震幼且弱族人利吾官者行將不利於震汝以女子從一年少後母其若之何女哭應曰吾雖孑然孱也請得事我母長我弟令嗣我父勲終不從婚媾去遺父憂矣榮卒女遂一意奉母保護震備至伯之子麟果欲奪震官令人百計誘女嫁女剪髮碎面以示已志旦則為震祈佑於天晝則勤女紅夜分不寐以給衣食竟育震成襲官且教以忠孝終身不嫁繼母王氏受旌女獨不及餘杭鄒幹為著孝烈傳

謹按舊通志作葉妙清至載其母王氏則曰華榮妻考萬厯杭州府志亦作華妙清今改正

何文貴妻范氏

萬厯杭州府志生子二歲而文貴以販鮮被風舟覆沒海中鄰舟歸報越

數日矣屍漂泊不知所之氏乃抱其孤號擗水濱凡五日屍隨潮上止淺灘旁穢敗莫識既視其左

手有約指在焉文貴物也昇之歸氏年二十三遂守節不變正德年旌表

陸氏二節

萬歷杭州府志張氏陸鎮妻年二十四鎮沒遺子榮誓死守志鎮弟陸二郎娶倪氏

二郎赴京身沒倪氏扶柩回杭竭力營葬同守姪榮成立正德年旌表雙節

金廣妻孔氏

萬歷杭州府志名妙真歸廣生二子廷珮方三歲廷瑞方週歲廣卒妙真年二

十七舅姑老紡績供養舅姑繼沒整家資以營葬訓廷瑞讀書舉進士仕至光祿卿寡居五十年正德年旌表

高貞女

兩浙名賢錄杭州右衛舍人高恂女許嫁陳丈濠濠病夭女聞訃製服往弔比發引又哭

送及墓因誓不再適或以未成婚諷之女曰一納陳氏幣即為陳氏婦何得以結褵與否異乃心居

七年卒夫家迎

其柩合葬焉

陳經妻勞氏

萬厯杭州府志名妙祥經沒遺三女上無舅姑下鮮兄弟氏年二十七七夕織

雖為生教育三女閉戶不出至親罕觀其面守節四十五年嘉靖年旌表

金模妻呂氏

兩浙名賢錄模客死姑蘇氏年二十七孤寒伶仃衣食不給撫幼子山成立時

郡城大火將及其廬氏焚香祝天旋即返風城南萬井煨燼而金氏之廬獨存嘉靖年旌表

姚經妻蔣氏

萬厯杭州府志經卒氏年二十七孝舅姑撫孤女選於宗屬得子銘為後又不

祿以從孫彩嗣之蔭居六十年不窺戶閭

田氏二節

萬厯杭州府志朱氏秀蘭仁和人年十八嫁錢塘田鳳甫二年鳳死無子朱氏躬刺

繡以自給日惟蔬素守志四十年朱氏毓秀錢塘人年十九適田鵬五載鵬疾亟朱刲股進竟不起遺孤大年甫三歲撫以成立不窺戶外垂五十年家故饒特蔬食布衣以勵志操並嘉靖年旌表

凌曰桂妻張氏

兩浙名賢錄夫後於伯氏夫卒舅氏繼沒遺孤僅五月氏時年二十六養

所後嫠姑備盡孝敬有強宗某者圖攘其室噉父張欲奪氏志又百計窘侮之氏乃截髮毀容拮据以植遺孤冀其立也命之曰立含哀茹戚六十年如一日孤長登進士官建昌守隆慶庚午二孫登名登瀛同舉於鄉瀛成進士

宋道弘妻陳氏

兩浙名賢錄道弘挾醫術攜家僑居崇德適海寇至一邑人盡走氏抱持

幼子與道弘相失遇賊賊迫之同行紹賊稍寬已置幼子并傍脫雙履投井中而死

王應奎妻鄭氏

萬歷杭州府志仁和人適錢塘王應奎應奎沒氏二十四歲遺二女筑筑

孑立誓死守志應奎六昆弟親屬內外皆富盛氏獨甘荼苦晚年王氏家益衰氏就母家及女長乃就養婿家年

六十五卒

何材妻葉氏

萬歷杭州府志仁和人適錢塘何材材父嘗贅居梁氏復稱梁材材沒氏年二

十五一女在襁褓日夕茹哀已瀕九死所親勸之曰梁何二族皆寡嗣息若幸有女長得善婿庶幾寄烝嘗焉氏為強食女既長贅壻

雖同居未嘗燕見年六十二卒

郎氏元貞

兩浙名賢錄許字高瑞瑞出游不返舅姑辭之父母欲更字氏以死誓一日從容言

曰吾向許身為高某妻弗獲壻於夫家願一識其門而還父母許之至門拜舅姑比晚促之歸氏曰

吾今日豈有還理乎婦人內夫家吾當於此代夫奉甘旨耳父母舅姑強之再三不可乃聽之居數歲以孝聞舅姑為之置嗣後有托名為瑞來歸者時姑已亡而舅目雙瞽不能復辨聞其述舊事甚悉喜曰真吾兒也氏曰語言容可偽此當以形體物色之既乃察其無耳後痣非是遂拒之人於是益賢其有貞志偉識云

李貞女

兩浙名賢錄名京許字王曰可未請期而王死京屏跡一小樓粗衣蔬食鬱鬱苦守八載

而病劇他無所言但囑取王生之像一見而訣至則已不及矣生之父難請從子合葬墓在石屋山陽之

徐貞女

萬厯杭州府志許聘沈麟為妻麟卒徐甫十歲泣告父母製服赴喪奉事舅姑以孝聞

終年紡績一室不踰戶限內外嫺親
莫覩其面年七十卒部使者表其門

秦某妻顧氏

萬厯錢塘縣志秦業醫不售兼病痿廢
貧甚為父母所逐無所得食謂氏曰爾

與我同餓死無益徒自苦孰若更事他人爾既得
所天吾亦賴爾幸少須臾無死氏飲泣不荅居數
日秦父母攜酒看來視其子相屬為耳語氏度其
必以已市也因却不飲食比夜呼女出汲井水令
返取罍即竄入井死明日出其屍衣裳
內外俱細縵連絡不見體時年二十九

郎經妻俞氏

萬厯錢塘縣志名敬淑年十六適經五
年經沒痛哭服滿以救甦撫二幼女繼

姑張氏迫之改嫁氏截髮斷指以誓

百計窘辱不可奪凡三十九年卒

朱卓然妻徐氏

萬厯錢塘縣志名淑順年二十適朱
三年生子方一月夫亡六年子亦亡

姑庇已女時有不堪氏勤慎
端恪姑亦化之萬歷年旌表

毛氏五節

杭州府志陳氏名秀芳十九嫁毛珣踰年
珣夭無子守貞五十二年珣姪希仲娶許

氏希仲卒許年二十七茹素終身希仲子應鉉應
鏞鉉亦早卒續娶婦童氏守節至八十三而沒鏞
游粵西客死妻孫氏守貞至八十又有毛鴻翰者
幼得癰疾脚痿不能行妻查氏扶持左右之鴻翰
沒查有貞操

許三姑

萬歷錢塘縣志許聘蔡九經未嫁九經卒許
年十七聞喪即持剪刺喉流血救甦奔喪擗

踊登姑樓剪髮食淡勤
女紅雖至親不覲其面

高氏三節

杭州府志朱氏高鑑妻年二十三鑑卒守
節四十五年子倫妻吳氏年二十七倫卒

守節三十五年隆慶年旌又姚氏
高自瀛妻年少守節萬厯年旌

姜縉妻胡氏

舊浙江通志年二十四縉卒族利其貧逼氏再嫁訟之官讞者欲試之語曰爾

少二子幼盡早決氏即拔骨簪刺雙
目流血盈階目遂瞽卒年九十九

毛偉妻沈氏

舊浙江通志年二十七而寡家貧拮据饑歲勤女紅哺三子殯翁姑不愆於禮

以子文龍晉都督
同知贈太夫人

潘聖姑

名山藏許聘孫登名登名卒聖姑聞計欲奔喪父母不許遂毀粧垢面服鷄斷葷閉門不

出富室爭求之輒欲自盡父母救甦久之登名之母死女聞哀毀幾絕密於室中置飯一盂遙奠夫姑遂裂衾自縊鄉人祠之以勵女節貽清堂日鈔烈女父母皆市井庸愚屢欲奪其志不從則大詬

罵甚且楚毒俱下女卒不少易以生撒靈之夕閉
戶雉經遺語侍婢曰願以骸骨從生地下其中永
縫紉甚密父母憐其
志乃歸生合窆焉

丁晁妻張氏

舊浙江通志晁日與酒人游年二十九
卒遺孤二家貧謀於母母曰今時重紵

絲巾帽若為之庶濟朝夕乃如
母言以勤十指萬厯初旌閭

沈四姑

杭州府志許字萬國彰彰年十五卒四姑固
請視殮至則服斬衰稱未亡人守節四十五

卒年

周招姑

杭州府志周友聞女許字郁從善從善計至
招姑欲往視舍父母斬之亡何郁母病盡危

甚女欲請往父母默然時方製衣取剪自刺母知
不可奪偕往侍姑湯藥刲股和羹以進姑遂愈繼

族之宜後者嘆曰吾無憂矣當報死者於九
原耳遂絕食數日死時萬厯乙卯年二十三

凌淑瑛

舊浙江通志年十四受沈九方聘未婚九方死淑瑛欲過沈守制母難之淑瑛曰委禽之

先唯與否惟命今日非母所能制也棄經入門撫棺哭氣幾絕起拜舅姑坐臥一小樓中又二年以卒

丁貞娥

杭州府志丁竹崖女魏生聘為繼室方委禽郡守以豪右言置魏獄娥夢黃玉杯墮地圻

問父何祥父告以故且曰魏郎病疫危甚奈何娥曰莫如誣服出獄門即不幸得正而斃矣父如言緩其獄出抵家卒娥聞慟哭請往父不許以死請母與俱往至則撫棺擗踊哭幾絕呼其二子前曰余與汝父問名耳然義與之齊豈以生死間哉余誓不出戶守汝父喪服闋教二子成立年六十六

卒

倪朱謨妻沈氏

杭州府志年十八歸謨生子洙龍謨卒氏年十九家貧取給十指值奇荒

作粥食姑與子而自啗糠餅或糜湯度日教洙龍成立郡縣旌門

葉履貞妻楊氏

錢塘縣志生女一而履貞死族人使改適輒斷髮毀容自誓已而思曰此

輩利吾財盡散所有與族人究心內典會壻母沈大白婦趙氏亦早寡撫孤婚嫁事畢樂修淨土與楊兩相得也先是趙有中表姑金幼字李九歲李歿時金父母相繼沒遺弟五齡誓不更適教育成立依趙共居一室屏絕人跡者三十年顏其淨修處曰三貞云

李隆春妻徐氏

黃汝亨李節婦傳十五而孀越四年而孀葬埋其夫亟赴水幾死矣姑排

之得出泣解之曰新婦欲從吾兒甚烈然從吾兒
母吾兒更慰地下節婦為感動自是不言死孝養
舅姑姑病羹股肉以進姑竟起從弟
富春有幼子因告於宗祐立以為子

陳氏三節

錢塘縣志高氏陳泰妻年二十二奉亡泰
兄謙欲火泰棺迫高他適高截髮自誓乃

止孤名宗仁娶於邵舉子六歲而宗仁卒時邵年
二十五與姑共撫之高年七十六卒邵年六十一
卒後泰孫新娶妻許氏年二
十三新亡亦守節五十年卒

張一賢妻蔣氏

杭州府志夫卒蔣勤機杼不言笑者
三十餘年次女適汪茂枝茂枝歿女

年二十餘守孤恐死
有母風崇禎時旌門

劉烈女

毛先舒劉烈女傳劉鎮之女吳生嘉諫聘焉
待年未行鎮家樓臨南新橋吳俗五月五日

蕩舟水嬉劉氏家樓望見之母以命女女不肯行
強之乃出里有惡少年張某者從橋下竊見之張
素以氣力食間里侮鎮家貧無所憚夜遂踰劉氏
垣而入女驚以為盜束衣起大呼鎮及妻皆起
擒得之張奴客數人闖入奪去遂為惡言讎女女
聞嗚咽曰吾義不辱人言今橫被誣即死猶可自
明廼投繯死鎮詣府以狀聞是歲崇禎十三年五
月七日也張陰行金屬詞丁甲求微文若和姦者
七字上府府案鞫曰和也法不當死一日丁甲暴
病言曰我劉烈女也惡少年能殺我生爾更污我
死得請於帝矣丁甲頭搶地俱碎食頃死知與不
知盡以為烈女果秉節能為神也鄉大夫咸詣中
丞言狀下其事司李竟以張抵
罪題請起家祠堂建烈女坊

顧文秀妻王氏

孫治顧節婦傳始文秀娶於鄭有一
子及娶節婦生二子文秀死時婦年

十九二子方襁褓謂前子曰汝家上虞故巨族也汝祖徙杭汝父以諸生即世若不早為治生計兩世魂魄不其餒而以遺索悉畀之且言汝兩弟吾辛勤十指可鞠勿以為念前子乃盡載入京數年以吏選授縣尉道出吳松遇盜殲焉節婦聞之攜子控當事緝巨魁斬之歸益發憤教子補邑弟子孫大成用薦官中書武林顧氏於是乎始大

傅氏三節

杭州府志莊氏傅元英繼室明末游騎抵武林元英子與霖奉母莊及妻錢氏弟世

禎婦陳氏同避兵於金家塍騎忽至家人競走林樾中莊及錢獨走江邊騎追之莊躍入江錢亦隨之陳稍後一騎猝及陳擲珠串祈免既入索復以威逼陳大罵被創死人稱傅氏三節

陳潛夫妻妾二孟氏

舊浙江通志潛夫官御史明亡沈淵死其妻慨然從之妾亦把

臂俱沈
於河

沈振傑妻黃氏

孫治黃烈婦傳明末兵至被擄舟出陡門婦躍水死越五日尸出於河不

順流東去而西湖至家酷暑中顏色如生其夫撫屍而慟婦兩目忽淚溢焉如

盛我凝妻李氏

錢塘縣志明末戎馬蹂躪氏被劫至武康之下溪灣俟其不備即投溪而

死越一日屍浮於溪胸抱大石逆流二十里見者收其骸胸石不解有力者不能脫數日後傳聞至

家我凝往拜之石即下

謹按宋元以前列女見於諸書者槩從採錄明代節孝舊志所載頗多備列則卷帙太繁缺略則姓氏湮沒故事實卓卓者俱為立傳其守志完貞確符年例而事跡略同者均列姓氏於後各邑倣此

吳怡妻孫氏

王葵妻周氏

林萬春妻陳氏

朱登妻錢氏

吳博妻殷氏

陳綱妻張氏

張杞妻錢氏

張翥妻朱氏

李登勲妻沈氏

李鸞妻陸氏

鄒觀妻張氏

尚邦寧妻沈氏

李鑰妻彭氏

劉萬春妻方氏

劉洲妻周氏

沈應科妻高氏

胡有慶妻褚氏

胡萬鍾妻吳氏

蕭鳳妻唐氏

徐彥鯉妻胡氏

何應聰妻郎氏

范桂年妻錢氏

沈尚友妻徐氏

朱璫妻顧氏

顧雙橋妻王氏

陸三謨妻印氏

朱珏妻傅氏

國朝

李士鈴妻蔡氏

舊浙江通志士鈴痛母喪嘔血而亡
蔡晝夜悲號竟扼喉以殉順治間奉

旨建坊旌

表

汪知元妻王氏

舊浙江通志知元早亡王年二
十五奉舅姑訓于卒年五十三

孫學敏妻楊氏

舊浙江通志年二十三而學敏卒事
舅姑孝姑有疾嘗割股以進而愈

楊士毅妻王氏

舊浙江通志年二十八士毅卒毀容
茹素營葬舅姑訓遺孤樹駿成立年

五十九卒

以上三氏俱康熙九年具題奉

旨建坊旌表

王四姑

舊浙江通志王一鳳女字徐天禧未婚禧亡姑方十五歲在室守貞誓不二適舅姑遣媒

勸其別字姑憂憤絕食而死康熙十年奉

旨建坊旌表

王之輔妻邵氏

錢塘縣志輔卒氏年二十八敬奉姑嫜姑亡常至姑墓攀木悲號灑淚著

樹樹為之枯逾數年復茂人異之康熙十一年奉

旨建坊旌表

盧貞女

錢塘縣志全人聘為繼室未婚全人死過門行三年喪上無翁姑下無子姓孤立守志夫

有遺田十畝巡撫范承謨檄蠲其役卒後題請奉

旨建坊旌表

胡萬銳妻姚氏

舊浙江通志萬銳卒姚教子具有法度守節四十年

沈贊化妻楊氏

錢塘縣志年二十二贊化死僅一女朝壘暮鹽鞠其女歸朱錫九守節三

十餘年卒

以上二氏俱康熙十二年奉

旨建坊旌表

王寅妻茹氏

錢塘縣志寅沒於盱眙氏年二十五將
婉聞計擗踊號哭胎應聲而墮則男也

已復產一男蓋孿生云家

貧苦節敬子年六十七卒

王德隆妻凌氏

舊浙江通志氏盛年守節白首完貞
以上二氏俱康熙十七年奉

旨建坊旌表

楊氏三節

題旌冊楊之挺妻陳氏年二十而寡訓其
子及孫皆有成立年八十五卒楊之瑛妻

朱氏年三十而寡至七十二而卒楊詰繼室朱氏
結褵三月而寡毀容截髮誓死守節康熙二十二

年具題奉

旨建坊旌表

李士謀妻胡氏

錢塘縣志年二十四而寡事舅姑孝姑病療力撫幼叔幼姑後長大分已

奩資完嫁娶康熙庚申秋大火比鄰皆灰燼氏號泣籲天即風返滅火人謂孝感所至

計功妻趙氏

杭州府志二十一歲夫亡生子起甫週歲飲冰茹藥奉侍兩代舅姑生養死葬

教子義方卒年五十七

程一桂妻趙氏

杭州府志一桂新安人業釀居錢塘娶氏為繼室氏年二十五夫亡守節

妾戴氏一桂遺命改適戴不忍去甘同撫孤氏守節三十七年以上三氏俱康熙二十三年奉

旨建坊旌表

汪起勳妻凌氏

題旌冊年二十七而寡守節三十四年

沈嗣英妻韓氏

題旌冊年二十三而寡生子兆發纔五月氏撫育藐孤守節六十四年

孫有光妻包氏

杭州府志年二十二夫亡一子長庚撫訓成立事舅姑生養死葬苦節三

十餘年
旨建坊旌表

以上三氏俱康熙二十五年具題奉

吳維翰妻沈氏

題旌冊年二十六而寡翁姑垂暮子女俱幼氏孝慈兼盡黽勉持家守節

二十
六年

李毓連妻季氏

題旌冊年二十一而寡奉舅姑撫孤穉苦節四十三年以上二氏俱奉

旨建坊旌表見於舊冊
不詳旌表年分

謝懋俊妻吳氏

題旌冊年二十一懋俊卒遺孤纔五月伯氏欲奪其志終不許事舅姑盡

孝子重綸亦以孝
稱守節五十年

汪岳蘊妻馬氏

題旌冊年二十三夫亡氏有娠五月
應男女未卜繼姪紹武為子後生紹

良撫育兩子無異視守節二十八年
以上二氏俱康熙三十三年具題奉

旨建坊旌表

施元龍妻孫氏

題旌冊年二十八而寡遺孤貞珉纔
五齡氏奉哀翁甘旨及子讀書脩脯

皆晝夜勤十指以給茶茗備嘗氏祖姑徐夫孀經
俱少寡守志人稱一門三節氏守節四十餘年康

熙三十五年具題奉
旨建坊旌表

時錢塘被旌者有邵之鳳妻謝氏陳林

苑妻汪氏胡元泰妻吳氏陳愚見繼妻范氏徐恒
泰妻蔣氏朱文鏡妻戴氏舊冊無考俱見施節婦

節孝錄

孫秀姑

題旌冊年十五歸楊文龍幼未婚也文龍父鼎元以康熙三十七年攜子負販之衢州秀

姑與姑侯氏家居其鄰有閭士積者素無行與其黨胡起龍暴橫里中三月八日侯臥病樓居士積突入室將犯之秀姑啣其指遂負痛逸去六月十六日秀姑獨坐門內士積穴壁持其足秀姑驚走泣訴於姑因并及前事侯氏聞於地總鄰人介士積詣楊謝比至侯憤甚擲茶筵擊士積誤中起龍起龍固袒士積者遂詈侯氏已又與士積踵楊之門辱之士積呼秀姑曰汝晝訴地鄰夜將安訴吾不能致汝者非夫也秀姑飲泣慰姑先燈下自縫紉其衣下及裙袴畢飲酒死則十八日之夜也天方盛暑顏色如生數日不變里甲以貞烈鳴於官巡撫具疏請奉

旨建坊旌表士

積論辟

陳大經妻金氏

題旌冊會稽人年十五歸大經於錢塘甫一載大經賈於粵病卒氏號泣

絕粒求死舅姑百方勸諭遂勵志守節四十餘年為嗣至老不廢織紉健持門戶守節四十餘年

戴永崑妻吳氏

題旌冊年二十而寡觸棺流血不欲生舅姑諭止之苦節三十五年

金璐妻沈氏

題旌冊年十六歸璐璐以痘死氏孝養翁姑撫繼子守節三十三年

朱樹勳妻姚氏

題旌冊年十九而寡勤十指奉兩代孀姑甘旨無缺及兩姑繼沒力營喪

葬守節三

十二年

胡宗稠妻沈氏

題旌冊年二十五宗稠客死氏號慟奔喪擬蹈水以殉姑諭止之乃勵節

事姑勤蠶桑自給撫繼
子承桃苦節五十年

楊德宏妻余氏

題旌冊年十六適德宏結褵甫一載
母喪未畢繼以姑喪哀痛倍至無何

德宏患時症死氏勺飲不入口晝夜哀號而卒距
德宏之沒十二日 以上六氏俱奉

旨建坊旌表見於舊冊

不詳旌表年分

沈貞女

題旌冊沈瑞春女許字范國章國章沒有為
女執柯者女聞截髮毀容鍵戶自縊以救免

祖姑王葦一尼菴居之旬日步歸曰非所宜居也
仍依母家獨處一小樓勤蠶織以終老卒年六十
三巡撫趙中喬具題奉

旨建坊旌表

武氏三節

題旌冊武孟蔭妻朱氏年二十五夫亡守
節二十四年武闢義妻李氏年十六歸闢

義闕義容死氏孀幼子奔喪備歷艱險守節四十六年武光祖妻林氏年二十三夫亡事孀姑以孝

稱守節三

十六年

費彥甫妻袁氏

題旌冊年十七而寡當明末寇盜充斥流離百折矢死靡他撫姪而姪殤

依壻而婿死焚焚無

倚守節五十四年

汪廷樞妻吳氏

題旌冊年二十六而寡訓子啓嘉成立以上五氏俱康熙四十四年具

題奉

旨建坊旌表

計貞女

題旌冊許字陳玉桓桓沒於閩計聞女泣請往奠既至曰今日從一終矣桓家素貧舅姑

老且病女日勤操作以供修葺舅姑沒家愈窶或日中未炊女卒無變志年六十餘巡撫黃秉中具

題奉

旨建坊旌表

楊蓮原妻俞氏

題旌冊年十九產女方三日夫亡氏推心絕粒舅姑勸諭乃繼姪為嗣敬

事舅姑勤十指自給後室遭回祿囊篋益空子媳孤孫相繼卒莞苦五十餘年

張裕善妻金氏

題旌冊歸裕善生二女裕善為廬陵丞留氏奉翁姑而已之任得瘵疾氏

聞買舟往視而裕善卒扶柩歸里時年二十四已而翁姑皆歿無繼嗣依壻以終守節四十年

顧濤妻王氏

題旌冊年二十九而寡守節三十年

柴棟妻孫氏

題旌冊年二十八而寡守節二十七年

吳欽相妻閔氏

題旌冊年二十四而寡守節三十年

嚴家鼎妻徐氏

題旌冊年十九而寡守節五十三年
以上六氏俱康熙五十年具題奉

旨建坊旌表

時錢塘被旌者又有程密妻傅氏周鍾
亮妻何氏舊冊無考見山陰王時履妻節孝錄

江榮舉妻凌氏

題旌冊年二十六榮舉卒無子立姪
為嗣從襁褓撫育成入拮据娶婦子

復歿偕媳王氏矢志苦守凌卒年八十九康熙五
十一年具題奉

旨建坊旌表

其娣鮑氏年二十九而夫江以鼃卒子承
甲方週歲三女俱幼氏赤手搯持生養死葬男婚

女嫁守節二十四年
見題旌冊不詳年分

張宗儒妻汪氏

題旌冊年十九適宗儒宗儒卒氏取
刀自裁舅姑力勸乃止撫子芬成立

旨建坊旌表

守節三十年康熙五十三年具題奉

方高矩妻吳氏

題旌冊氏結褵未幾翁與夫暨叔俱遠出死客邸姑病於家氏時年二十

五隻身侍奉百計醫藥不遺餘力里黨咸稱之守節三十一年

范玉珩妻于氏

題旌冊年十八夫亡姑抱病臥牀氏飲泣侍奉歷久不懈守節四十一年

鄭允中妻孟氏

題旌冊年二十四而寡事舅姑以孝謹稱撫孤子成立守節四十年

程可發妻朱氏

題旌冊年二十八而寡事舅姑撫遺孤守節二十五年

吳鏞妻姚氏

題旌冊年二十六而寡布衣蔬食以終其身守節二十八年

孫燿妻陸氏

題旌冊年二十六而寡勵志苦守足不踰閭守節三十五年

姚廷益妻鍾氏

題旌冊年二十六而寡奉其舅甚謹撫遺孤宗樞以讀書砥行相勛守節

旨建坊旌表

四十年

以上七氏俱康熙六十年具題奉

沃天麟妻余氏

題旌冊年二十二夫亡絕粒誓死舅姑勸慰乃忍死孝養守節三十一年

陳映垣妻費氏

題旌冊年二十三夫亡遺孤未晬氏養老撫幼咸取辦十指守節四十年

江臣五妻黃氏

題旌冊年二十八而寡家貧績麻以供朝夕事孀姑生養死葬靡不盡禮

撫孤子有成守

節二十五年

沈文龍妻王氏

題旌冊年二十二而寡舅姑老氏晝夜勤十指以供甘旨及沒力完喪葬

守節三

十一年

沈勝業妻趙氏

題旌冊年二十九而寡事孀姑以孝謹稱撫訓幼子家聲不墜守節三十

三年 以上五氏俱雍正元年具題奉
旨建坊旌表

金氏二節

題旌冊金城妻宋氏其弟金培妻梁氏宋
年二十二梁年二十八夫相繼亡妯娌最

相善冰霜節操彼此交勵宋撫姪錦為嗣梁撫
姪祖望為嗣俱以母教成立苦節三十餘年

朱寶箴妻詹氏

題旌冊年二十八而寡無子姑年老
多病氏侍奉左右朝夕不離立繼承

祧守節四

十一年

高正妻王氏

題旌冊年二十二而寡家貧藉箴
紉以養舅姑訓子守節二十七年

顧豫中妻朱氏

題旌冊夫客死氏年二十五扶櫬歸
里撫訓二子有成持家嚴肅言笑不

苟守節一

十七年

王弘曾妻姚氏

題旌冊年二十六而寡二子數度皆幼氏教以讀書砥行次子度以薦授

延川知縣守

節四十餘年

潘起奎妻徐氏

題旌冊年二十四而寡遺孤二氏鞠育稍長即擇師督訓不為姑息守節

三十

四年

湯紹武妻吳氏

題旌冊年二十七而寡勤織紉以事舅姑舅姑沒親營窀穸撫遺孤訓以

禮義守節

五十四年

朱弘道妻潘氏

題旌冊年二十一而寡無子立繼承桃守節三十餘年

俞紹曾妻勞氏

題旌冊年十八夫亡無子舅姑老寢疾藥必親嘗撫繼子則織屨縫裳以

給膏火守節

四十三年

虞浩妻朱氏

題旌冊年二十三夫亡遺娠生子
曰棠恩勤撫育守節三十一年

余之錫妻王氏

題旌冊年二十夫亡遺孤甫五月健
持門戶撫子有成守節四十八年

沈恒妻王氏

題旌冊年二十八夫亡無
子立姪為嗣守節三十年

沈玉如妻趙氏

題旌冊年二十三夫亡親操井臼撫
三齡弱子遭鄰火室廬灰燼無存艱

苦備嘗守

節六十年

趙裕妻金氏

題旌冊年二十一夫亡無子撫
繼子以續蒸嘗守節三十餘年

汪跣妻吳氏

題旌冊年二十四而寡遺孤殤繼子又
殤復繼孫承祧守節三十七年以上

十六氏俱雍正二年具題奉
旨建坊旌表

趙荃妻吳氏

題旌冊年二十九夫亡事姑嫜先意承志姑沒力營窀穸并葬其夫撫繼嗣咸

立守節二

十七年

陳必達繼妻沈氏

題旌冊年二十九而寡撫前室子及己子鞠育教誨無異視家貧力

勤女紅守節

五十四年

方餘妻潘氏

題旌冊年二十四而寡遺孤幼舅姑年邁氏朝夕針黹以供饗飧課子讀書有

成守節四

十一年

謝聖正妻程氏

題旌冊年十八而寡家貧姑老氏勤女紅奉養沒為營葬守節六十四年

王鼎妻沈氏

題旌冊年二十九而寡事孀姑孝姑嘗病劇氏籲天求代姑病得瘳守節四十

年一

范允欽妻沈氏

題旌冊年二十一而寡無子撫繼子慶治為嗣長娶氏姪女亦早寡氏復

偕媳撫孫守節五十一年

黃右釗妻王氏

題旌冊年二十二而寡無子立繼承祧事舅姑潔供脩繕及沒營葬盡禮

守節四

十五年

梁王曾妻莫氏

題旌冊年二十九而寡孝事祖姑雖處窘迫甘旨必備撫三子以養以教

守節二

十四年

徐介眉妻楊氏

題旌冊年二十八而寡撫姪為嗣守節四十六年

蘇授蒼妻裘氏

題旌冊年二十六而寡舅姑沒殯殮宅安之事竭蹶以圖尤刻勵以教其

子夜三鼓機杼聲猶與書聲相應也守節二十餘年

趙躍龍妻姜氏

題旌冊年二十七而寡事姑孝姑病衣不解帶者累月撫遺孤慈嚴備至

守節三

十六年

方貽謀妻李氏

題旌冊年二十四而寡奉孀姑二十餘年孝敬不懈撫夫幼弟成立守節

二十

七年

趙琦妻吳氏

題旌冊年二十七而寡無子立姪為後嘗割股以療姑疾守節四十七年

盧黈妻虞氏

題旌冊年二十五而寡姑繼沒兩喪並舉衣貲變易殆盡家益貧荼苦撫孤姪

得延一綫守

節四十二年

許弘劬妻俞氏

題旌冊年二十三而寡仰事俯育百計支持以成大志守節四十二年

陳于王妻周氏

題旌冊年二十九夫亡課子成立舅姑沒旁無伯叔氏獨營喪葬備嘗艱

苦守節四

十四年

盧茂妾管氏

題旌冊年二十八而寡父母欲奪其志氏剪髮毀容猶強之不已甚至赴水投

繯乃懼而止事其嫡甚謹至老猶晝夜勤機杼不懈守節五十八年

武德正妻陳氏

題旌冊年二十五而寡遺孤二齡又殤撫姪姪死復撫姪孫文彬為後守

節五十二年 以上十八氏俱雍正三年具題奉
旨建坊旌表

陳氏二節

題旌冊陳元錫妻邵氏年二十九夫亡陳
三錫妻范氏年二十六夫亡俱能孝養翁

姑撫子成立守

節各五十餘年

趙承祿妻唐氏

題旌冊年二十九而寡遺二孤皆幼
氏侍奉孀姑潔供滫瀡撫子有成守

節三十

二年

蔡憲奇妻朱氏

題旌冊年二十九而寡事舅姑孝舅
姑沒脫替珥以完喪葬教子以義方

守節二

十四年

屠翼昭妻裘氏

題旌冊年二十五而寡二子俱幼氏
上事下撫孝慈兼盡守節四十五年

章士傑妻朱氏

題旌冊年二十一而寡事舅姑以孝謹稱無子立繼子自襁褓迄於成人

劬勞撫訓守

節四十五年

盛肇昌妻包氏

題旌冊年二十八而寡遺娠五月生一子矢志不二撫孤成立守節三十

年四

楊萬鑑妾蔡氏

題旌冊年二十七而寡遺孤洪溥方五齡家貧藉箴紉以給養殯守節四

十六年
音建坊旌表

以上八氏俱雍正四年具題奉

羅天彝妻金氏

題旌冊年二十一夫亡遺孤甫十月氏截髮毀容誓死不移事姑盡孝撫

子有成守節

五十二年

包紹穀繼妻李氏

題旌冊年二十八而寡家貧奉養姑甚謹藉十指以供甘旨冬日兩

手盡瘁若不知也遺孤濤力不能就外傳身自督課少怠則哭失聲濤用是淬勵後成進士守節四

十五年

葛大楷繼妻吳氏

題旌冊年十九而寡無子舅姑沒竭蹶營葬撫繼子以延似續守節

三十三年

朱紳妻李氏

題旌冊年二十八而寡家貧舅姑俱病勤十指供湯藥三載及沒躬負土以葬

并其夫祔焉教子成

立守節三十一年

陸曾錫妻諸氏

題旌冊年二十五而寡家貧紡織養姑姑沒親營窀穸其母黃氏亦早寡

氏事之甚孝守

節三十七年

洪雲漢妻李氏

題旌冊年二十九而寡翁年垂暮氏織紉奉養二子幼督令誦讀至午夜

不輟守節

三十三年

宋嗣昌妻黃氏

題旌冊年二十九而寡事舅姑撫二孤守節四十六年

翁爾湘妻傅氏

題旌冊年二十七而寡事孀姑撫嗣子守節四十六年

陳華玉妻凌氏

題旌冊年二十二而寡事孀姑撫幼子力勤操作守節四十三年

李兆文妻高氏

題旌冊年二十九而寡家貧歷盡艱辛課子有成守節四十八年

屠時隆妾張氏

題旌冊年二十六而寡奉養孀姑撫訓幼子守節四十二年以上十一

氏俱雍正五年具題奉

旨建坊旌表

任萊妻孫氏

題旌冊年十八夫亡冰霜自矢事舅姑孝教其子家聲不墜守節三十三年

姚廷誥妻劉氏

題旌冊年二十九而寡遺孤尚幼舅姑沒力營葬事健持門戶孤長娶婦

生孫而子又歿氏復偕

媳撫孤守節三十四年

朱氏二節

題旌冊朱錫驊妻陳氏朱觀策妻李氏俱二十八而寡事孀姑撫幼子閨門嚴肅至

老而足跡皆不出戶外陳守節

四十二年李守節二十四年

章氏二節

題旌冊章金鐸妻駱氏章金鼎妻沈氏姊妹也駱年二十六沈年二十九相繼而寡

駱無子沈止一女兩孀交勵名義事舅姑甚孝駱守節二十七年沈守節四十八年

魏書升妻施氏

題旌冊年二十三而寡織紉育孤孫長督之學亦不廢耕守節三十年

沈引祖妻邵氏

題旌冊年二十三而寡遺孤又歿立繼承祧守節四十八年

陳咸妻葉氏

題旌冊年二十五而寡撫孤成立守節五十年

趙王麒妻吳氏

題旌冊年二十五而寡撫遺孤守節五十年

田璵妻王氏

題旌冊年二十五而寡撫遺孤守節二十六年

孫九錫妻丁氏

題旌冊年二十九而寡事衰翁撫遺孤守節四十六年

汪元善妻邱氏

題旌冊年二十九而寡事舅姑撫孤守節三十一年

朱官龍妻滑氏

題旌冊年二十九而寡割股以療翁疾鞠子景隆成立守節一十六年卒

吳德昌妻戴氏

題旌冊年二十八而寡守節一十六年卒

黃思沛妻吳氏

題旌冊年二十而寡翁姑繼沒鬻衣飾營葬繼姪為後守節二十六年

季子舒妻謝氏

題旌冊年二十六而寡守節三十七年

邵懷棠妻章氏

題旌冊年三十而寡守節二十一年

周彊妾潘氏

題旌冊年二十三而寡守節二十九年

汪健師妾趙氏

題旌冊年二十四而寡守節三十五年

莫孝女

題旌冊名勝儒性至孝年十三父京病侍湯藥不離左右及沒哀毀如成人聞其孝者爭

欲締姻勝儒以兄美章遠出母傅氏無侍奉者誓不嫁母再三勸諭知其意堅遂聽之於是屏服飾

棄脂粉布衣操作以供母母病衣不解帶樂必親
嘗夜則焚香籲天願以身代母卒視含殮畢絕粒
求死既而翻然曰父母未葬我未可死乃晝夜紡
績鉢積數年遂擇地營葬遠近觀者皆以為雖男
子不能及也
卒年四十一

徐大姑

題旌冊許字施士標未婚士標沒大姑年二
十一間計欲以身殉父母勸慰遂歸施守制

以姪大勇為嗣自歸施後連遭八喪隻身經理備
極荼苦守貞三十年以上二十二氏俱雍正六

年具題奉
旨建坊旌表

陸宗靄妻章氏

題旌冊年二十七而寡遺子女各
一撫教有成守節二十二年卒

陳茂雄妻沈氏

題旌冊年二十而寡事寡翁撫
繼嗣茹素終身守節二十五年

張基妻金氏

題旌冊年二十七而寡事孀姑撫繼嗣守節一十六年卒

段志名妻王氏

題旌冊年二十三歸段甫二載翁客死於粵夫奔喪亦卒於旅邸氏甫二

十五歲無子以姪為嗣家貧薄田數畝餽粥不給夫之弟又私售於人族衆勸氏鳴官氏曰吾雖餓

死不怨以田產細故傷夫

手足也守節三十九年

胡宗模妻陳氏

題旌冊年十七適宗模甫匝月宗模為鳴鶴場大使之任卒於官氏年十

八聞訃悲慟絕食舅姑勸慰乃止後舅姑兩叔俱

亡本支已絕氏告宗族擇繼承祧守節四十一年

嚴其肅妻方氏

題旌冊年二十九而寡翁姑早喪子成憲僅三齡宗黨憐其無依勸更適

氏誓死不從

守節四十年

袁弘謨妻朱氏

題旌冊年二十九而寡子彤甫四歲訓誨極嚴姑目失明扶掖不離左右

守節二

十二年

江國標妻吳氏

題旌冊年二十九而寡翁姑垂暮二子琳倫俱幼家貧氏力供菽水守節

二十

二年

孫子範妻張氏

題旌冊年二十九而寡遺一女旁無可繼人有憐其無倚者勸之更嫁氏

矢志益堅守

節三十三年

朱小溪妻孫氏

題旌冊年二十七而寡家貧鬻衣飾以完喪葬教育二子守節四十一年

屠彬妻姚氏

題旌冊年二十七而寡事孀姑教二子一女守節二十六年

李蓮妻程氏

題旌冊年二十三而寡事繼姑孝無子以姪為嗣守節二十八年

王廷顯妻陳氏

題旌冊年二十五而寡撫二子守節二十七年

倪允發妻黃氏

題旌冊年二十三而寡無子立繼守節四十年

李季元妻謝氏

題旌冊年二十九而寡撫幼子守節三十五年以上十五氏俱雍正七

年具題奉旨建坊旌表

熊天琳妻邵氏

題旌冊天琳以難蔭授瑞安守備值閩變死之氏年二十九在署恐賊至

被辱以子女托夫之友令急去而手執白刃以俟幸賊不至遂矢節撫孤每慰陳先人忠烈訓其子子以蔭登仕籍無忝厥職母之教也守節五十三年卒

裘錫錦妻張氏

題旌冊年二十七而寡事翁孝撫二子有成守節五十四年

李之發妻徐氏

題旌冊年二十三而寡營葬舅姑及夫撫子延禧成立守節二十三年

吳景鎮妻姚氏

題旌冊年二十而寡遺腹生子又殤立姪為嗣事姑孝守節二十六年

沈法妻馬氏

題旌冊年二十九而寡繼姪玖璿為嗣俱有成守節二十年

朱琦妻胡氏

題旌冊年二十五而寡事翁姑撫遺腹子守節一十六年卒

孫之騶妻查氏

題旌冊年二十三而寡當于歸時夫已患瘵疾氏茹素禱天願以身代又

先撫姪堂為子及夫卒堂始週歲氏鞠育教誨俾至成立事孀姑甚孝守節三十年

徐文高妻沈氏

題旌冊年十九歸徐未半載夫就暮河南七載而客死氏年二十五撫孤

姪映薇為子越五載舅姑繼沒歸
依母家教子有成守節三十一年

聞人瑜妻沈氏

題旌冊年二十四而寡三子俱幼家
貧棲止一椽日用之需悉出針紉值

歲歉竭力以奉舅姑舅姑沒二喪並舉
茶苦備至教子以義方守節三十七年

柴榮昌妻周氏

題旌冊年二十七而寡撫二子俱死
僅遺孤孫氏復撫之守節四十一年

李長吉妻楊氏

題旌冊年二十八而寡家貧事
孀姑撫幼子守節三十六年

盛大熊妻何氏

題旌冊年二十九而寡舅姑繼逝氏
力營窻窠撫二子守節二十六年

王孫楫妻楊氏

題旌冊年三十二而寡家貧勤針黹
以養舅姑立姪為嗣守節四十四年

翁士麟妻沈氏

題旌冊年二十八而寡撫
子成立守節三十一年

王公宇妻馬氏

題旌冊年二十二而寡事姑撫子守節三十二年

章纘符妻姚氏

題旌冊年二十八而寡事舅姑撫子守節二十四年

周必昌妻錢氏

題旌冊年二十六而寡無子立姪為嗣守節三十五年

范汝韓妻蘇氏

題旌冊年二十九而寡撫三子一女守節二十七年

王宰妻鄭氏

題旌冊年二十八而寡事舅姑撫遺腹子守節五十二年

蔣王元妻徐氏

題旌冊年二十七而寡事孀姑撫子守節三十二年

俞申伯妻陸氏

題旌冊年二十四而寡繼姪為子子夭復撫孤孫承祀守節五十年

盛文彬妻孫氏

題旌冊年二十七而寡事舅姑撫子守節五十一年以上二十二氏俱

雍正八年具題奉

旨建坊旌表

徐萬春妻金氏

題旌冊年二十八而寡家貧遺二子不能就外傳氏親課經書俾各成立

壽至九十五兩子年踰七十

孫曾林立人謂苦節之報

沈濂妻朱氏

題旌冊年二十九而寡遺二子貧不能自存氏晝夜勤女紅以供餽粥撫教有

成守節四

十三年

李永驥妻丁氏

題旌冊年二十八而夫客死河南姑已早喪祖姑癰瘕氏久奉湯藥無厭

倦子甫週歲教育

成立守節四十年

楊日榮妻李氏

題旌冊年二十四而寡遺腹生子婦張氏亦早孀與之共事姑嫜無間言

守節二

十一年

毛楷妻馮氏

題旌冊年二十二而寡撫遺孤葬舅姑并告於宗族出所積以葬先世十九棺

之暴露者守

節四十八年

林兆哲繼妻楊氏

題旌冊年二十八夫通判平樂卒於官氏扶櫬歸里撫前妻子及已

子無異視前妻子歿與媳徐氏共勵冰霜守節三十一年

胡廷鐸妻范氏

題旌冊年二十七而寡斷髮自誓撫遺孤守節四十二年

馬謹菴妻朱氏

題旌冊年二十七而寡事衰翁撫幼孤守節五十四年

王毓奇妻翁氏

題旌冊年二十而寡無子繼姪為嗣守節二十四年

楊學顏妻柯氏

題旌冊年二十九而夫客死處州事孀姑撫二子一女守節四十年

汪躍妻胡氏

題旌冊年二十九而寡事兩代孀姑撫幼子棠長娶吳氏亦早孀氏偕媳矢志

守節三

十二年

王元信妻汪氏

題旌冊年二十九而寡撫遺孤及幼叔守節四十九年

王國擴繼妻陳氏

題旌冊年二十六而寡撫二子守節二十八年

張廷玠妻胡氏

題旌冊年二十六夫亡室廬燬於火氏甘心荼苦事舅姑以養以葬訓子

有成守節

五十四年

程賡妻徐氏

題旌冊年二十九夫客死粵東遺子女各一氏事姑甚孝姑沒後以母老兄弟

又遠出遂歸侍奉其
母守節四十五年

吳汝霖妻沈氏

題旌冊年二十六而寡遺孤二齡姑目瞽翁足廢旁無叔伯氏隻身奉養

二老教子讀書
守節二十六年

張文標繼妻姚氏

題旌冊年二十五而寡觸棺暈絕救甦即營葬舅姑及夫與前室而

已築壙於旁以示志復遭鄰火室廬蕩然撫姪為子子復歿艱苦備嘗守節三十三年

沈國瑛繼妻任氏

題旌冊年二十六而寡姑繼沒子與媳又歿僅遺孤孫煒煒子立守

節四十
六年

吳一龍妻陸氏

題旌冊年二十九而寡遺子女各一子歿立姪為嗣孝事孀姑守節三

十六年

羅大紹妻金氏

題旌冊年十八而寡撫姪為嗣事奉舅姑并父母兩姓咸稱其孝守節三

十一年

錢昭嗣妻徐氏

題旌冊年二十六而寡遺孤甫六月舅老藉十指以給養殮孝慈兼至守

節二十八年

楊日廣妻張氏

題旌冊年二十七而寡如李氏亦早孀張無子鞠李之子為嗣守節二十

九年

方吉甫妻宋氏

題旌冊年二十九而寡撫子子歿復撫孤孫守節五十四年

盛觀華妻馮氏

題旌冊年二十二而寡事孀姑撫繼嗣布衣茹素守節五十六年

沈俊生妻高氏

題旌冊年二十六而寡事舅姑撫二子守節三十年

陸元宰妻陳氏

題旌冊年二十五而寡事孀姑撫子守節三十六年

徐淞妻盛氏

題旌冊年二十八而寡事哀翁撫繼嗣守節三十六年

茅秀芝妻沈氏

題旌冊年二十八而寡事舅姑撫子守節四十五年

張繼祖妻沈氏

題旌冊年二十四而寡事孀姑撫子守節四十年

吳維正妾胡氏

題旌冊年二十九而寡親族以家貧令再醮氏以死自誓事其嫡甚謹嫡

無子止氏一子訓之

極嚴守節三十二年

楊二姑

題旌冊楊學顏女生甫彌月而父亡及能言見母柯氏常哭問父何在母告之遂抱母號

慟自是母哭未嘗不相對哭也聞其孝者爭欲求婚二姑不許戚黨勸之姑曰吾非母無以至今日母非吾無以終天年人各有志可相強乎遂侍奉其母母死哀毀成疾而卒

胡貞女

題旌冊許字江承麟未婚承麟卒女年十五聞訃欲殉父母護之謹遂歸江守節孝舅姑

立繼嗣貞操三十餘年 以上三十二氏俱雍正九年具題奉

旨建坊旌

表

李祖望妻邵氏

題旌冊年二十三而寡撫族姪為嗣守節四十年

張起濤妻何氏

題旌冊年二十九而寡撫子守節四十三年

沈仲新妻李氏

題旌冊年二十八而寡撫姪孫為孫守節五十一年

范體仁妻吾丘氏

題旌冊年二十八而寡撫子守節三十年

莫與兆妻唐氏

題旌冊年二十九而寡撫子守節五十三年

方時澄妻王氏

題旌冊年二十三而寡時澄為孝子聲弘子氏結褵僅四載守節三十一

年克循婦道與長姒
潘氏並以賢孝著

婁邦憲妻陳氏

題旌冊年二十八而寡守節五十年

俞士鳳妻楊氏

題旌冊年二十八而寡守節二十一年

徐中吉妻湯氏

題旌冊年二十一而寡撫子守節四十八年

吳嘉曾妻張氏

題旌冊年二十七而寡舅以傷子疾痿氏度事不敢懈撫幼子守節二十

年四

金紫巷妻沈氏

題旌冊年二十九而寡撫子守節二十四年

汪濤妻楊氏

題旌冊年二十五而寡事祖舅姑及舅姑殯殮盡禮撫子守節二十九年

顧佩錕妻沈氏

題旌冊年二十七夫亡孀姑在堂紡織以供甘旨姑病三年親奉湯藥衣

不解帶沒後奉姑柩與翁合葬并以夫棺柩於旁躬自負土不避風雨哀感行路撫訓遺孤俾得成

立守節三

十四年

李志良妻陳氏

題旌冊年二十八而寡撫子守節二十九年

蔡賜英繼妻陳氏

題旌冊年二十九而寡撫前室子女守節二十四年

沈仁嗣妻江氏

題旌冊年二十九而寡撫子守節五十二年

馬紹恒妻蔡氏

題旌冊年二十七而寡事姑撫子守節二十八年

鮑守恩妻章氏

題旌冊年二十七而寡事舅姑撫姪為嗣守節四十三年

陳國安妻馮氏

題旌冊年二十九而寡事舅姑撫子守節五十一年

滑吉登妻陳氏

題旌冊年二十九而寡撫子守節三十年

蕭元宰妻葉氏

題旌冊年二十九而寡事舅姑一子二女皆夭繼姪為嗣守節二十六年

陳學尼繼妻陳氏

題旌冊年二十六而寡撫前室子及已子皆成立守節二十五年

張起鼎妻林氏

題旌冊年二十九而寡事
老姑撫子守節二十二年

沈士芳妻周氏

題旌冊年二十八而寡事舅姑繼姪
為嗣復歿繼孫承後守節四十六年

徐任保妻張氏

題旌冊年二十八而寡
撫子守節三十二年

沈君選妻夏氏

題旌冊年三十二而寡事
孀姑撫子守節四十八年

吳御六妻蔣氏

題旌冊年二十九而寡事
舅姑撫子守節三十一年

馮祐妻張氏

題旌冊年二十九而寡無子積女紅資
為翁娶妾生一子週歲即歿氏遵翁命

以第三婿莫楷為嗣未幾女卒復為
娶婦生子以繼烝嘗守節三十四年

盧涵妻吳氏

題旌冊年二十四而寡事舅姑撫子守
節二十九年以上二十九氏俱雍正

十年具題奉
旨建坊旌表

沈祚錫妻朱氏

題旌冊年十九夫亡投繯服酒翁姑救甦勉以大義始進饘粥孝養克盡

婦道撫繼子逾於已生勤女紅寒暑不輟長齋終身守節二十八年

王宗翰妻孫氏

題旌冊年二十九夫亡絕粒不食舅姑曰汝死我亦不能再生乃進饘粥

事舅姑凡廿旨必親奉以進沒後盡哀盡禮無子撫姪如已出守節四十年

孔衍昌妻陳氏

題旌冊衍昌力學成疾氏日則調治醫藥夜則禱祈身代夫亡願以身殉

氣絕竟日家人救之始甦上有翁姑不以家貧貽堂上憂承惟一如夫在時教遺孤以義方出夫生前所著書以示之且泣且示書有淚痕子亦號泣捧讀焉守節二十六年

陳士慶妻鄒氏

題旌冊年二十八夫亡絕粒從死孀姑勉以大義始進饘粥事姑曲盡孝

養遺孤二必易以善事祖母姑沒盡鬻嫁時衣以供喪葬二子皆入泮苦節五十三年

黃章妾施氏

題旌冊章任襄陽知府卒於官氏仰天長號曰上有垂白之嫡下有襁褓之孤

奚忍殉死而不身任其事耶遂堅貞自矢嫡素染瘋疾事之如姑一子出繼夫兄未嘗以猶子膜視

守節一十七年

邱智本妻吳氏

題旌冊年十七而夫疾竭力奉湯藥衣不解帶者三年夫沒長齋事佛侍

奉舅姑曲意承惟喪葬盡禮撫

孤慈嚴交至守節四十七年

章煥如妻張氏

題旌冊年二十四夫沒無子繼姪為子撫教成立勤儉自持守節四十六

年

莫爾吉妻馮氏

題旌冊年二十三而寡念翁姑衰邁強延喘息以代子職迨翁姑相繼逝

世竭力以營喪葬無子依女以居守節四十九年

孫兆龍妻張氏

題旌冊年二十六夫亡一慟幾絕老姑在堂曲意承歡姑每語姻婭曰吾

有此媳不為無子姑沒喪葬盡禮遺孤復殤擇猶子以續宗祧守節二十九年

朱應龍妻胡氏

題旌冊年二十一而寡翁姑在堂雖家徒四壁而甘旨無缺皆從十指中

出也翁姑先後沒喪葬盡禮教遺孤以義方守節四十四年

許鼎文妻江氏

題旌冊年二十五夫沒矢志以殉父諭以舅姑年高因感泣守貞姑患目

青度禱於神親為飮拭目復明後舅
姑相繼沒喪葬盡禮守節二十年

朱維周妻謝氏

題旌冊年二十四夫亡閉戶不食翁
姑勉以大義乃繼姪為嗣勤針黹紡

織以供菽水

守節三十年

樊長齡妻陸氏

題旌冊年二十三夫亡事堂上能以
色養翁姑窻窻之事必身自執役雖

冲寒冒雪亦所不顧遺孤婚娶復
沒撫孫教以成立守節四十七年

翁元岳妻張氏

題旌冊年二十七歲而夫沒時方有
娠搜身自墜樓下久而獲甦後遺孤

生徧體青紫蓋腹中受傷所致也姑亡事舅先意
承志得其懽心訓二子極嚴均以髫年入泮每逢
忌辰縞衣蔬食哀泣如初喪值初度二子稱慶
泣誓不受曰身不死尚何祝耶守節二十七年

仲季超妻金氏

題旌冊年二十八夫亡絕粒欲殉念翁姑在堂飲泣為未亡人事堂上備

得懽心翁姑沒殯葬不遺餘力無子
覺榮孑立立志彌堅守節四十九年

黃錢昌妻董氏

題旌冊年二十一夫亡哀號絕粒親族勸以撫孤延嗣乃矢志守貞足不

踰閭姻婭罕觀其面數十年如一日
教子義方毫無姑息守節三十八年

金慎言妻方氏

題旌冊年二十八夫亡翁抱喪明之痛大病幾危旦夕顛天願以身代翁

病年愈偕老姑在堂孝養以終其天年遺孤一子
一女婚嫁之費皆從十指中出守節三十四年

沈與錄妻計氏

題旌冊年二十二歲夫沒號泣暈地死而復甦者再翁亦相繼亡事姑先

意承志以供菽水遺孤方在襁褓日勤紡績
延師課讀俾得成立守節三十六年

程鵬瀚妾施氏

題旌冊年二十九歲而夫卒事主婦克盡敬謹主婦沒哀痛若喪夫遺孤

方幼撫育成

守節二十九年

沈象新妻孫氏

題旌冊年二十一而寡事舅姑撫子守節三十四年

吳序昭妻袁氏

題旌冊年二十八而寡事父母以孝稱家貧勤針黹營葬翁姑撫子成立

足不踰戶言不出

閨苦節二十八年

張貞女

題旌冊名二姑許字朱聖迪年十九聖迪卒聞訃慟絕屢欲投繯父母防範之不得行且

議改適姑誓死不從父母沒遂歸於朱舅姑相繼逝生事死葬無失禮守貞三十五年

徐士鈺妻朱氏

題旌冊年二十七而寡事舅姑撫子守節三十年

嚴肇文妻沈氏

題旌冊年十八而寡守節三十九年
以上二十四氏俱雍正十一年具

題奉

旨建坊旌表

唐士奇妻沈氏

題旌冊年二十八夫亡家貧勤女紅
以給餬粥雖祁寒盛暑每至夜分不

輟教子世科讀書不為
姑息守節五十九年

姜與濂妻諸氏

題旌冊年二十七夫亡事舅姑每食
必潔泔瀝以進甚至衣貲罄盡而於

舅姑前笑言相慰勿使聞知撫
教幼子有成守節二十八年

程自康妻吳氏

題旌冊年二十四夫亡孀姑在堂曲
盡孝養姑沒營喪葬盡禮撫子斯敏

慈嚴並至守
節四十九年

孫國鼎妻趙氏

題旌冊年二十二夫亡事舅姑生養死葬教二子以義方守節四十年

戴恩榮繼妻朱氏

題旌冊年二十五夫亡前室遺七女氏分已奩佐夫嫁其四其三尚

幼氏子方孩抱家無期功近親氏隻身教育至男有室女有家并營葬其夫守節三十五年

陸介蕃妻周氏

題旌冊年二十九夫亡遺腹生一子鞠育教誨嘗泣而告之曰若父不及

見若之生若能成人是若父雖死猶生也甫成童而氏卒守節一十六年

潘大煜妻解氏

題旌冊年二十一夫亡事舅姑孝撫幼子成立守節二十年

季望妻陳氏

題旌冊年二十六夫亡舅姑老子幼辛勤十指以給薪水舅姑沒喪葬皆拮据

經營教子能讀書

守節二十六年

鍾尚元妻楊氏

題旌冊年二十九而寡家貧藉女紅以養舅姑撫二子長家稍裕猶不肯

一日自逸守

節二十八年

武祐晉妻呂氏

題旌冊年二十九夫亡截髮自誓撫襁褓子至於成立事舅姑養生送死

無遺憾守節

二十五年

吳檉妾黃氏

題旌冊檉官濟寧州知州納氏為側室生二子一女檉亡氏年二十五閨二載

嫡又亡氏事舅姑每食必親捧盤匱以進疾則衣不解帶侍湯藥沒喪葬盡禮教子煜文炯文成立

女歸士族守

節二十七年

劉爾昇妻張氏

題旌冊年二十八夫亡遺腹生子兆元氏幼而撫長而教茶苦備嘗俾得

成立守節

二十四年

陳元吉妻唐氏

題旌冊年二十九而寡事舅姑撫子守節四十九年

陳綺章妻諸氏

題旌冊年二十五夫亡事孀姑孝教子有成至老猶勤紡績足不踰戶親

戚無識其面者

守節三十七年

俞濤妻沈氏

題旌冊年二十適濤二十三夫亡子甫三歲女未彌月舅姑在堂值歲饑已食

糠粃而奉養無缺教子

女成立守節三十年

王朝瑛妻周氏

題旌冊父世傑無子贅朝瑛於家生二子朝瑛亡氏年二十九舅姑早喪

遂居家養父母父母卒家益貧窘炊烟嘗絕隆冬猶衣葛處敗屋中遇風雨輒震撼將壓若有護之

者已而地忽生藤蔓延屋上盤結交錯天成一竇如戶牖通出入風雨攸蔽屋賴以固氏紡績教子其中遠近異之稱曰王寡婦藤室守節三十年

謝之鼎妻李氏

題旌冊年二十五夫亡于甫晬舅姑在堂氏上事下撫備極勞瘁舅卒事

姑尤孝謹守節二十六年

吳禹臣妻趙氏

題旌冊年二十九而寡撫子女慈嚴並至薪水之貲取給十指守節三十

六年

周士名妻俞氏

題旌冊年二十四適士名生子殤夫亡氏年二十七遺腹生子又殤繼姪

以延夫祀守節四十二年

姚昌宗妻范氏

蔡茂功妻范氏

題旌冊范勝甫女也勝甫無子長女

字姚昌宗年十七將遣嫁泣告父曰父膝下無兒女即子也妹尚幼兒去誰為侍奉聞舅有四子夫即出贅猶有三子承懼盡言之父遣媒請贅昌宗於家甫一載昌宗卒無子事父母益孝且時以針黹所入購甘旨以餉舅姑次女適蔡茂功年二十九而寡生二子姑沒舅在堂生養死葬盡禮父母卒與姊協力營窀穸以一子繼姊撫教成立為父母後范氏血食賴以不墜長女守節四十一年次女守節二十年

奚嵩妻陳氏

題旌冊年二十六夫亡遺子五歲氏葬舅及夫事姑孝教子具有法度性好施

親族貧乏者多待以舉火守節三十三年

張守泰妻楊氏

題旌冊年十七適守泰事繼姑甚孝姑亡守泰方依兄平陽官舍氏產女

甫三日即起治舍殮盡哀盡禮守泰兄以官帑待償廢其公產至無尺椽之庇氏依父家以居略無怨言兄沒復拮据以歸其喪初守泰死氏年二十九號慟幾絕水漿不入口者數日遺孤三俱幼乃強起撫孤日夜課讀俾克成立長子摯尤才俊名動公卿間氏守節三十三年

傅子厚妻韓氏

題旌冊年二十八夫亡無子止一女事姑孝姑沒氏以針黹所入錙銖積

累數十年始得營葬并祔其夫於旁守節四十二年

江光秀妻王氏

題旌冊年二十七夫亡無子養舅姑一十六年取給於紡績者為多舅姑

沒負土成墳家益貧窘無依其弟迎養之守節四十三年

方孝女

題旌冊名閭英父大化官廣西撫標中軍未之任卒於京閭英上有三兄長依婦翁於粵

東次就幕入閨季事戎伍閭英獨與母居有欲締姻者閭英曰諸兄遠離膝下兒願效古之撒環瑱至老不嫁者母勸之不從乃聽之事母先意承志母病奉湯藥目不交睫沒則哀毀骨立水漿不入口者三日諸兄歸為父母卜葬閭英悉出所蓄以襄事後有顯者喪偶聞其孝遣媒議姻諸兄欲許之閭英曰吾年逾三十安能復向人作新婦哉且彼宦游無定吾終不忍離父母墳墓也遂依諸兄終其身以上二十六氏俱雍正十二年具題奉旨建坊旌表

吳觀珪妻汪氏

題旌冊觀珪客死嘉定氏年二十五舅七旬失明一女六歲子三歲氏上

事下撫備極勞苦舅沒事姑尤孝謹母病歸寧值風雨室傾壓瓦礫中人疑為死矣出之無恙遠近

異之後為子女營婚嫁心力俱瘁嬰疾不起守節一十六年

周兆鑑妻江氏

題旌冊年二十六夫亡遺孤幼居廬被火所親悲其困乏氏安於義命守

節一十

六年卒

劉于生妻倪氏

題旌冊年十九夫亡無子孝養舅姑舅姑沒氏年方艾旁無族屬有勸之

他適者氏曰劉氏絕矣我縱不能為身後計然我在則血食猶未斬也貧不自給依母家以終老守

節六十

五年卒

潘之謙妻屠氏

題旌冊年二十七夫亡遺孤幼撫之及長教以義方守節一十九年卒

莊鼎鈺妻張氏

題旌冊年二十九夫亡五子俱幼室廬遭燬舅姑老且病常臥床褥氏拮

据湯藥茶苦備嘗舅姑沒鬻衣資營葬其夫及夫之昆弟六棺並柩焉守節一十九年卒

王玉宇妻李氏

題旌冊年二十八夫亡一子幼氏勤織紉教子成立守節三十四年

蔡端妻沈氏

題旌冊年二十二夫亡未幾舅又亡事繼姑孝撫姪肇麟為嗣守節二十九年

蔡樸菴妻朱氏

題旌冊年二十三夫亡一子在抱家貧日夕勤女紅餬口嚴冬酷暑夜漏

三下猶不輟守節三十五年

周璽妻仲氏

題旌冊年二十九夫亡遺二子一女絕無依倚氏矢志不二工蠶歲常倍收有

轉貸其種者亦如之自是名聞遠邇爭賀周節婦家蠶種家稍裕遂得撫其子女畢婚嫁守節二十

四年

黃巨源妻蔣氏

題旌冊年二十六夫亡遺腹生子嗣
瑗撫之長教以義方為娶婦諸孫統

膝守節三

十六年

龔培和繼妻丘氏

題旌冊年二十八夫亡于女四人
前室出者二家素貧復遇歉歲氏

上事老姑下撫子女凡釐鹽薪米
無不出自十指間守節三十六年

俞俊妻邵氏

題旌冊年二十夫亡時曾祖姑祖舅姑
舅姑三世俱存痛俊蚤歿遺孤孱弱慮

氏年幼難自立氏誓不二夫閨門整肅三代尊人
相繼沒喪葬如禮子長娶婦生孫守節三十八年

方繹如妻孫氏

題旌冊年二十八夫亡于方週歲家
貧衣食不給歸依父母撫訓其子成

立守節二

十九年

顧元吉妾馬氏

題旌冊元吉卒氏年二十八正嫡年逾六旬生四女氏一子氏事嫡如姑

佐之婚嫁嫡亡哀毀過禮

教子有成守節二十三年

黃獻可妻余氏

題旌冊年二十七夫亡于幼氏撫訓成立事舅姑生則盡養沒為營葬守

節五十

六年

方尚震妻吳氏

題旌冊年二十四結褵甫三月夫亡立姪肇賢為嗣事孀姑孝姑臥病經

年侍奉湯藥無少懈及沒力營喪莫

不以貧而儉其親守節四十五年

裘崧生妻陳氏

題旌冊年二十七夫亡子女俱幼勤紡績以事姑完子女婚嫁守節二十

六年

陳昌妻閔氏

題旌冊年二十二夫亡舅姑在堂舅妾生一子氏念夫無後似續惟叔是賴自

襁褓至成人皆氏撫

訓守節三十八年

仲貞女

題旌冊仲子亮之女許字吳廷俊婚有日矣廷俊亡女闔戶投繯救姪父母環守之乃鵠

素奔喪事舅姑能得惟心撫姪為子以延夫祀守貞三十四年 以上十九代俱雍正十三年具題

旌候

朝教

謹按前明列女悉據舊籍登載我朝教化日隆表章特著故窮鄉僻壤婦人女子皆知勵

名節敦孝行較之前代尤不勝書凡已邀

旌典者均據題旌冊年次先後備列於前其有冊內失

載或未經旌表散見志乘文集及由地方官據各學公舉核實申報者均附錄於後至志乘中之事

跡略同限於卷帙不能備採

立傳者謹紀姓氏如前例

趙氏二節

錢塘縣志勞氏廣德州守趙景和妻秦氏其妾也值馬士英亂兵沿途殺掠過州景

和不納士英怒縱火攻城遂遇害勞欲自劉庶姑朱以藐孤當撫止之崎嶇戎馬間扶櫬歸杭荼苦備至教子蒼璧成進士官御史秦氏聞景和被殺密縫衣裾升樓躍入皆并死州民殮之顏色如生

章一桂妻高氏

舊浙江通志歸章十月而寡姑徐寢疾廁踰澣濯逾年不厭姑且死執高

手曰願來生更為而婦高經理姑喪貧益甚苦節六十年而卒

施氏二節

錢塘縣志徐氏施繼山妻繼山卒氏年二十遺孤三人家貧以針紉為業每瀝粥為

飯飯子而自飲其濡其次子有坤婦經氏年二十餘夫死守節綽有姑風

謹按有坤舊通志府志俱作
施士今從施氏苦節錄改正

張氏四節

杭州府志沈氏張垓副室汪氏張堯彩妻
朱氏張翥妻周氏張英妻沈年二十四垓

沒服酒而死汪年二十二夫故歷四十九載完節
而終朱與周其姪婦也朱以翥沒屢欲自盡父防
之嚴不得死及撫孤稍長遂從容成其初志以
瞑周亦早廢苦節四十餘年人以為一門四節

許鼎昌妻尚氏

舊浙江通志事姑以孝聞姑死長
號曰姑捨我去安往乎一慟而絕

吳至乙妻姚氏

舊浙江通志結褵期年至乙疾姚到
左臂進卒不起未幾姑疾到右臂為

康卒亦不起兩臂創甚養病母家已病且革昇繩
牀歸強扶再拜與親訣曰非不知魂魄依父母也
顧女有家義不可去仍返吳
氏之寢曰得死所矣遂瞑

汪亢宗妻鮑氏

錢塘縣志亢宗病亡氏欲以身殉舅姑勉以立孤乃止已而二子俱殤氏

遂閉戶服酒死

徐茂芳妻孫氏

舊浙江通志年十七適徐甫五載而茂芳卒遺孤僅六月且茂芳同胞二

人皆貧早逝無子孫氏旦夕焚香告天曰徐氏三枝共此一兒願天佑使成立惟教以義方不為姑息長奴趙亦早寡守志有同德焉

項毓禎妻張氏

杭州府志毓禎覆舟死氏奔赴投江以救得生守節撫孤始終如一迨子

景修婚畢遂決意絕食而死其媳何氏夫喪亦矢志茹齋鵠素人交頌之

蔣仝妻徐氏

舊浙江通志仝未婚失明姻戚謂仝無受室理徐聞之曰古人不以婦瞽棄成

言吾敢以夫誓有他志耶誓死嫁佺甫二年佺卒立志守貞以終其身

顧氏二節

杭州府志蔣氏毛氏妯娌也蔣為顧儒英妻儒英死蔣剪髮明志茹苦食貧教子讀

書儒英弟奇英娶毛氏婚十月而奇英沒無子女空樓獨處五十三年七十餘卒

沈杰妾張氏

杭州府志杰卒張年二十九家貧父母欲奪之不可會豪強強委禽張嚙指出

血斷髮自誓晝夜織作以事其嫡嫡疾割股以進杰柩未殯百計營葬教兩孤成立年六十六卒

張所修妻汪氏

舊浙江通志年二十四所修得疾不起以目視汪曰吾死汝何如汪泣即

舉刀斷一指曰設有不虞以此指先殉君地下吾當恐死教孤敢有他志乎所修乃瞑汪後夫三十

年卒

胡雲鵬妻王氏

舊浙江通志年二十三夫沒以簪刺喉流血仆地子遵仁八歲痛哭抽搐

出乃得甦於是散髮毀面窮居守貞課子成立

邵周書妻陸氏

錢塘縣志年十九歸周書周書卒時陸方婉身抱孤墮涕曰天如不絕邵

氏我當作未亡人十五年間者弗為意也名孤曰芳迨年十五出應試陸謂曰汝可自立我將報汝父地下矣芳驚訝陸曰戲耳詰旦自縊死製哀經及遺命皆預存麓中殮之日容色如生

查梓妾王氏

錢塘縣志梓客秦娶氏年十五挈歸浙中食貧操作者十年梓沒氏即服酒死

吳錫妻戴氏

毛奇齡吳烈婦墓誌錢塘學生吳錫字天與比鄰戴氏女年十歲父死哭泣過

哀幾失明人以孝女呼之因聘焉年十六合卺十八天與鄉試下第遂致病越三年死當天與病

時戴侍湯藥不脫衣知不治請先死天與曰吾未死而汝死是以死促我也戴泣而止天與將屬纊呼弟鑰曰汝嫂將必死我死屬家人伺之天與死戴以首觸棺碎首血被面家人環伺之絞以巾刺以裙刀凡求死者七最後吞金不得死乃密壞玻璃瓶吞其廉腸斷嘔碧血數升死距天與死時凡四十二日時康熙二十七年某月日也年二十里人建祠於西湖葛嶺下曰吞金祠

高良妻童氏

錢塘縣志良傭春其舅陳四為輿夫傭巨商家暇甥婦有姿色故虐使良不令

與其婦合未逾年良死四陰計欲以氏獻某商為妾氏哭誓彌甚絕粒七日而沒未幾四暴疾卒

翁常節妻孫氏妾膝氏

杭州府志常節沒膝絕食死未幾子駿業亦死孫與媳孫

氏共屬
志守節

郭貞女

錢塘縣志海寧郭斗山女錢塘吳唐所聘也唐卒氏登門拜姑婢服衰經守總帷厝夫棺

於祖墓側翁姑沒父孀歸海寧衣鵲茹素不聞笑語卒與吳唐同穴

熊氏二烈

公舉事實熊應鳳妻陳氏及其妾繆氏也應鳳官海寧溫州磐石營順治十五年

海寇陷城應鳳不屈死二氏曰吾夫盡節我二人不死臨難苟免非烈女子也遂相與投繯而絕時

陳年三十繆年二十三

羅育萬妻楊氏

公舉事實年二十二歸羅三年夫沒姑已亡惟翁在堂于甫襁褓氏忍死

事翁撫子越四載翁沒子痘殤氏泣曰吾所不死者以有子也今已矣遂絕食死時年二十九

周墀妻俞氏

公舉事實夫亡止一子鐸甫離襁褓驚手以給餵粥子稍長督課甚嚴中雍正

癸卯副榜人
稱母教云

徐嘉謨妻金氏

公舉事實性至孝年九歲母疾焚香告天終夜號泣願以身代及歸徐事

舅姑先意承志姑嘗患癰醫不能治氏以口吸膿血手奉湯藥衣不解帶者三十七晝夜姑遂瘳翁貧而好施有姚姓以饑鬻子翁憐其幼而不言氏典衣飾以贖之嘉謨卒於京邸柩不能歸氏紡績二年常爨火不舉而積資以奔喪後長子歿媳龐氏以死殉人稱節孝萃於一門

張世謨妻姚氏

公舉事實世謨館於外氏事繼姑孔克盡孝敬姑性嚴厲氏委曲承順一

語必察其旨否一寢必時其寒煖先意承志能得其懼姑患乳癰至危篤氏侍湯藥拂拭吮舐不辭污穢至痛楚輒籲天求代姑沒哀毀逾節相夫力舉三喪宗黨咸稱其孝

陳氏三節

題旌冊庠生陳嘉起字又虞之妻王氏年十七歸又虞甫七載而寡事舅姑能盡于

職歲乙酉浴王竄杭人心煽惑氏奉姑暨母攜孤李避嚴州建德之大洲村值方馬弄兵抗

王師賊首艷氏才色強委幣聘氏曰吾固有以報夫子賊至率惟視之赫然髮絕容毀血流衣裾矣相顧駭愕戒勿犯而去姑則驚悸不起治棺余如禮賊平迎喪歸葬又值耄舅大故赤手拮据如禮一如喪姑時守節三十七年于士錄字甄侯婦方氏孫嗣源婦汪氏皆以節孝聞方氏年十六歸甄侯既失所天哀毀幾絕念姑以節烈待旌而哀哀遺孤又一綫千鈞之重非撫以長何以慰吾姑強起教育成立守節二十五年汪氏本世儒家知大義事孀姑盡孝教予以文名而恬恬愉愉能以苦節自得奉甘者守節二十五年長子梓以三氏節孝請題俱

金定邑志
卷二百二
旨旌表

吳士龍妻丁氏

吳興周妻馮氏

金志遠妻唐氏

金大章妻毛氏

裘昌嗣妻徐氏

凌克開妻陶氏

朱志達妻車氏

楊天驕妻汪氏

金萬鈞妻沈氏

姚垣妻陸氏

姜士鑑妻徐氏

段起鴻妻陳氏

嚴渤妻陸氏

吳俊妻侯氏

王予賓妻潘氏

曹守紀妻王氏

王世祚妻許氏

童必昌妻韓氏

張懋德妻李氏

徐可大妻嚴氏

金祖錫妻張氏

傅相妻路氏

沈昭遠妻劉氏

陳博學妻陸氏

周羽侯妻馮氏

錢彪妻李氏

錢俸妻于氏

楊志明妻張氏

王英妻許氏

梁欲濟妻徐氏

吳果妻高氏

潘開暘妻翁氏

竇尚璉妻蘇氏

沈起龍妻俞氏

吳農復妻章氏

吳容妻陳氏

吳爽妻張氏

吳望中妻汪氏

俞德興妻章氏

劉廷獻妻程氏

妾惠氏

王聘妻陳氏

朱穎蕃妻趙氏

翁遵厚妻何氏

戴原育妻潘氏

馬必科妻李氏

李茂芳妻嚴氏

蔡岑妻余氏

劉兆選妻吳氏

朱南絃妻吳氏

周奭妻沈氏

金之翰妻吳氏

胡爾橙妻吳氏

張昌喬妻趙氏

陸鴻妻俞氏

徐實妻陳氏

盧程京妻陳氏

吳德同妻程氏

徐德厚妻沈氏

周攀桂妻黃氏

孔聞韶妻沈氏

章茂叔妻屠氏

胡雲上妻范氏

鄭淵妻張氏

姜與濂妻諸氏

潘士第妻汪氏

蘇瓚妻王氏

范武音妻朱氏

孫淵妻裴氏

宋緒山妻沈氏

錢允昌妻湯氏

金頴實妻錢氏

鍾卞妻錢氏

金建烈妻方氏

洪雲漢妻陸氏

孫允昌妻程氏

張文治妻汪氏

吳賓賢妻程氏

彭繼周妻朱氏

陳其善妻徐氏

謝天恩妻王氏

查克澂妻徐氏

陳煥妻郁氏

陳有相妻沈氏

趙啟楨妻金氏

潘杓煥妻陳氏

潘堯日妻陳氏

盧鴻勳妻邵氏

戴允中妻徐氏

勞偉妻張氏

汪元璇妻畢氏

茹兆之妻顧氏

胡承虞妻方氏

浙江通志卷二百二